

清史列傳

清史列傳 卷四十四

大臣傳續編九

瑞昌

瑞昌鈕祜祿氏滿洲鑲黃旗人六世祖敖德以軍功授騎都尉世職瑞昌由拜唐阿於嘉慶二十四年授鑾儀衛整儀尉道光元年遷治儀正六年陞雲麾使十八年四月充協理堂務章京九月陞冠軍使二十年充總理堂務章京二十四年襲世職二十七年軍政卓異二十九年七月署鑲白旗蒙古副都統九月授正白旗漢軍副都統咸豐元年署鑲紅旗護軍統領旋調盛京金州副都統二年以捐輸軍餉下部議敘三年正月調吉林副都統二月授杭州將軍時粵匪洪秀全等由湖北下竄江南連陷江寧鎮江揚州三府冀圖北竄三月上命瑞昌統帶盛京官兵赴淮徐防剿五月命專辦山東防剿事務六月賊酋李開芳由河南汜水渡河陷溫縣遂圍懷慶府瑞昌馳赴濮州截擊八月懷慶圍解命留於濮州一帶防剿並於山東直隸交界處所一體嚴防十二月賊竄直隸境擾獨流靜海瑞昌帶兵

移紮靜海城南三里莊四年正月賊撲河西村莊瑞昌等督軍攻其南面斃賊無算旋由西南進攻賊營賊出拒我兵鼓勇直前賊潰尋由靜海竄出占踞河間縣之東城村一帶欽差大臣都統勝保令瑞昌分路進攻逼其巢賊抵死抗拒束城賊亦出接應我軍分股截殺賊敗退四月賊竄東光縣屬之連鎮瑞昌隨欽差參贊大臣科爾沁郡王僧格林沁統兵攻剿自七月至十二月賊疊次撲營均被擊退五年欽差大臣都統西凌阿直隸秦寧鎮總兵慶祺等督帶馬步官軍在南北兩面會攻瑞昌在河西扼截攻毀賊巢木城斃賊殆盡擒逆首林鳳祥並偽總制檢點多名奏入得旨嘉獎敕赴杭州將軍任十年二月金陵賊由安徽寧國一帶竄入浙江圍湖州府尋分股攻陷杭州省城瑞昌督率滿軍堅守駐防城待援適提督張玉良由江寧大營督援兵至出賊不意將武林錢塘門外及昭慶寺賊壘全行掃蕩瑞昌派八旗兵縋城兜剿遂克復省城事聞諭曰杭州將軍瑞昌於省城被陷後尙能堅守駐防城至六七日之久以待援兵會同克復厥功甚偉著賞穿黃馬褂並賞給二等輕車都尉世職四月賊連陷江蘇常州無錫遂竄據蘇州上以欽差大臣廣西提督張玉良駐軍無錫不能力遏兇鋒褫其職命瑞昌總統

江南諸軍迅赴蘇州力圖攻克五月偕巡撫王有齡奏請將嘉興失守攜銀潛逃之署寧波府知府張玉藻革職拏問得旨卽行正法以爲棄城逃避者戒九月賊由淳安縣陷嚴州府上命瑞昌等迅速進攻毋任滋蔓十月富陽縣失守瑞昌由省城派兵乘夜往攻賊棄城遁復竄陷餘杭縣徑撲省城瑞昌親自督戰副都統傑純與副將吳再升各手刃執旗賊目數名賊勢稍卻尋復分三股來撲瑞昌鏖戰竟日賊大潰復令吳再升進逼餘杭縣城克之奏入諭曰此次逆匪大股竄撲杭州兇醜甚熾經瑞昌等調兵剿辦以少勝多立解城圍並克復餘杭縣城實屬調度有方瑞昌著加恩賞給一等輕車都尉世職時嚴州踞賊復糾合死黨圖襲我軍後路瑞昌令已革提督張玉良擊退之並復嚴州府得旨嘉獎十一月賊大股圍攻湖州府記名道趙景賢等擊卻之十一年官軍節次收復江山常山富陽遂安海鹽新城分水臨安等縣瑞昌等請將出力及陣亡文武員弁獎勵優卹允之四月賊自嘉興府水陸分撲石門縣吳再升迎剿失利城遂陷瑞昌等劾之得旨褫再升職責令帶罪圖功瑞昌旋因捐輸軍餉下部優敘先是上命在籍前任漕運總督邵燦爲浙江督辦團練大臣至是以辦理團務不洽輿情瑞昌偕王有

齡奏請撤退從之並諭瑞昌等查訊幫辦紳士陶慶章等如有侵蝕情弊嚴行懲辦五月安徽婺源縣踞匪由白沙關竄至華埠連陷常山江山縣復分股由開化遂安竄入淳安縣之港口並攻陷壽昌縣上命瑞昌迅飭帶兵各員力圖克復未幾龍游長興金華各府縣城相繼失陷上以瑞昌王有齡督辦軍務屢失郡邑從未自請處分均革職留任六月江西之賊由江山縣竄陷遂昌松陽永康各縣命瑞昌等迅速進剿會永康之賊又竄擾義烏縣瑞昌奏參處州鎮總兵文瑞於賊合股下竄時節退守遂至義烏失陷命將文瑞革職留任責令防守諸暨進剿金華八月剿平處州府各屬之賊十月大股賊圍攻嚴州張玉良偕副將羅大春迎戰失利賊由大南門越城而入另股賊由幽嶺關並陷餘杭縣上以瑞昌王有齡調度乖方均下部嚴議時賊勢張甚瑞昌偕王有齡馳奏請檄閩兵來浙援剿而援軍逗遛不進賊連陷蕭山諸暨二縣及紹興府尋糾合各路賊匪併力圍攻省城自紹興失守餉源已絕而外援不至賊圍益急瑞昌偕王有齡率文武員弁嬰城固守城中死亡枕藉城遂陷瑞昌及王有齡死之江蘇巡撫薛煥以聞諭曰浙江省城被圍已逾兩月卒以糧盡援絕於十一月二十八日被匪攻陷覽奏曷

勝憤懣杭州將軍瑞昌浙江巡撫王有齡殉難情形及闔城文武下落著曾國藩慶端左宗棠查明具奏再降諭旨同治元年諭曰前據薛煥奏杭州城陷當經降旨令曾國藩等將瑞昌王有齡等殉難情形查明具奏茲據曾國藩奏查明瑞昌王有齡均已殉難並請賜卹等語杭州將軍瑞昌於前次浙江省城失陷時堅守駐防城垣鏖戰待援六日之內卽將省城克復厥功甚偉茲復臨難捐軀忠烈卓著大節凜然可嘉可憫瑞昌著追贈太子太保銜照將軍陣亡例從優賜卹任內一切處分悉予開復所有前次賞給二等輕車都尉世職著加恩改爲一等輕車都尉承襲六次襲次完時以恩騎尉世襲罔替尋賜卹如例予諡忠壯入祀京師昭忠祠並於殉難地方建立專祠三年諭曰原任杭州將軍瑞昌前在杭州殉難業經降旨從優賜卹並給予世職茲據左宗棠奏稱瑞昌之妾吳氏於杭城陷時逃出見已回至杭城伊子緒成緒恩年皆幼穉當時被賊衝散無蹤見經輾轉物色始悉其第三子爲人收養業已給予吳氏領回派員護送回旗等語瑞昌前在杭州守城有功旋復見危授命大節凜然據奏其幼子緒恩散失多年竟能無恙覽之實深欣慰著俟護送到京時交鑲黃旗滿洲傳知瑞昌長子內閣中書緒光

領回收養緒光著該旗卽行帶領引見緒恩著俟及歲時由該旗帶領引見緒成尙無下落仍著左宗棠隨時詳細查訪以示朝廷篤念蓋臣推恩後嗣之至意尋經吏部照例以兩次賞給輕車都尉世職併爲三等子爵

宗室綿洵

宗室綿洵鑲白旗人曾祖和碩淳度親王允祐祖多羅淳慎郡王宏炯父多羅貝勒永鑿綿洵由應封宗室於道光六年考授奉恩將軍七年授三等侍衛十七年陞二等侍衛二十一年擢前鋒參領二十四年授復州城守尉二十八年調遼陽城守尉尋署金州副都統咸豐元年陞涼州副都統三年二月調江寧副都統以捐備軍餉下部優敘時粵逆洪秀全等竄踞江寧省城復分股擾及河南等省綿洵以捐備軍餉下部優敘六月綿洵請隨陝甘總督舒興阿軍營辦理防堵允之八月賊由河南懷慶府竄山西垣曲等處幫辦軍務內閣學士勝保等會兵追剿綿洵以舒興阿檄由茅津渡河截擊九月賊由黎城回竄直隸臨洺關勝保繞出賊前綿洵亦帶兵追擊賊旋由晉州竄入深州並分擾安平蠡縣屢經官軍攻擊退踞深州連日不出勝保督軍進攻適綿洵等帶兵趕到分攻東南一面隨剿隨

進直至城隅敗之餘賊南竄是役也綿洵一軍戰最力勝保以聞四年正月賊竄
陷靜海縣並分踞附近村鎮官軍進取西河頭靜海城中出賊二千餘鈔襲其後
綿洵擊卻之三月賊另股竄踞山東臨清州綿洵偕勝保分隊急攻復之四月臨
清潰賊南遁綿洵追剿紮營州之東南以扼南竄之路其分竄豐縣之賊綿洵復
乘夜追擊殲擒殆盡餘賊三百名長跪乞降五月事竣經勝保保奏得旨賞綽爾
歡巴圖魯名號閏七月隨參贊大臣科爾沁郡王僧格林沁進剿東光縣連鎮之
賊時賊被圍久屢圖竄逸會風雨大作突向西南出撲綿洵開放槍礮斃賊無算
五年正月察哈爾都統西凌阿由北面進攻綿洵由南面燬賊木城乘勝直擣其
巢逆首林鳳祥身受重傷潛匿地洞被我軍搜獲並獲僞典制僞檢點多名斬擒
壓斃及投水者甚夥疊經僧格林沁疏聞得旨加都統銜並賞穿黃馬褂四月隨
僧格林沁攻克馮官屯賞戴花翎旋授荊州將軍五月命馳赴湖北幫辦西凌阿
軍務六月行抵襄陽偕西凌阿奏與湖廣總督官文會商在京山天門撥兵防剿
並親督兵勇從襄陽順流下擊七月德安踞賊分撲三陂港官軍失利綿洵以未
能及時攻取並步兵屢潰命革職仍留軍營差遣八月署湖北提督九月漢陽賊

匪上竄麥旺薊綿洵分隊由天門截擊敗之遂合諸軍進剿克復漢陽等城奏入得旨開復原官七年荆門州敗賊劉尙義等竄擾武安堰經知府唐訓方攻剿勢急率衆來歸綿洵委員察看實情分別遣散先後奏入均報聞八年卒諭曰荆州將軍綿洵由侍衛洊陞副都統曾在江南豐縣剿賊出力賞給巴圖魯名號並在連鎮軍營著有勞績嗣簡任荆州將軍帶兵防剿襄陽等處匪徒荆州一帶悉臻安堵方資倚畀遽聞溘逝悼惜殊深著加恩照將軍例賜卹准其入城治喪賞銀三百兩經理喪事任內一切處分悉予開復應得卹典該衙門察例具奏伊子奕欽奕棟著俟百日孝滿後由該衙門帶領引見用示朕篤念盡臣之至意尋賜卹如例予諡莊武子奕欽奉恩將軍奕棟賞宗人府主事

托雲保

托雲保額哲特氏滿洲正黃旗人吉林駐防嘉慶十八年由馬甲隨剿河南教匪拔藍翎長道光四年洊陞副護軍參領七年以剿平逆回辦理善後事宜經欽差大臣直隸總督邢彥成奏請帶往喀什噶爾差委事竣回旗八年陞護軍參領十二年充虎槍長十五年充諳達三十年正月賞頭等侍衛在乾清門行走充壓馬

大臣三月授上駟院卿十二月賞副都統銜咸豐元年擢正紅旗漢軍副都統二年上由慕陵旋蹕中途乘馬失跌托雲保以平日騎壓不慎下部議處三年二月粵匪洪秀全等竄陷江寧省城大軍進剿托雲保遵旨帶吉林官兵二千名南下尋賊擾河南奉檄赴援行抵延津縣境弁兵等搶奪民間牲畜逞兇傷人欽差大臣直隸總督訥爾經額以托雲保約束不嚴疏劾之降三級調用仍留營七月賊渡河北薄懷慶府環城築壘圍攻甚急我軍馳抵丹河鋪迤南之季村合力攻剿托雲保督馬隊會諸軍力戰焚燬賊壘殲賊多名八月懷慶圍解賊衆西竄我軍追剿至濟源縣風門山口遇伏賊托雲保督馬隊疾驅而進賊倉猝失措殲擒大半並槍殪賊目搜殺匿匪殆盡賊大股闖入山西由垣曲絳縣曲沃陷平陽府城踞之我軍跟蹤追及於府城外列營堵截欽差大臣都統勝保以托雲保追剿不力參奏命摘去翎頂嗣賊由山西竄擾直隸分踞靜海縣暨獨流鎮托雲保隨勝保疾馳尾追自深州至獨流歷次攻擊獲勝十月勝保上其功賞還翎頂十一月獨流賊負嵎抵拒並由靜海分股應援勝保逼攻賊壘托雲保由隄岸分鈔大敗之十二月我軍進紮葡萄窪一帶遇靜海援賊賊出撲我軍分路迎擊托雲保奮

力鈔襲殲賊五六百人賊勢遂蹙尋因病開缺回旗四年八月病痊發往勝保軍營差委十二月授正藍旗蒙古副都統先是賊由連鎮分竄山東高唐州踞其城勝保移師往剿圍攻數月未克五年二月勝保以師久無功褫職逮問賊旋由高唐竄踞馮官屯托雲保隨參贊大臣科爾沁博多勒噶台親王僧格林沁移營赴剿是月調正紅旗蒙古副都統四月大軍攻克馮官屯俘逆首李開芳北路肅清托雲保在事出力經僧格林沁奏保賞換花翎尋凱撤回京五月命在御前侍衛上行走十月授奉宸苑卿十一月調鑲紅旗滿洲副都統十二月擢寧夏將軍先是寧夏兵丁於道光二十二年奏准添演秋圍每歲將軍與副都統輪流帶領官兵前往賀蘭山一帶肄習馬上鳥槍技藝嗣因甘肅協餉短絀暫行停止六年上以各路軍營馬隊得力令西安寧夏官兵一律添演秋圍托雲保偕副都統奕樑奏言寧夏駐防官兵行圍錢糧皆係官借官還兵借兵還與綏遠城之有卡倫房租可以由公項給發者不同見在餉項不足兵力孔艱若復加以行圍給項不特不能清還未免累上加累請俟協餉充裕仍行按年輪流照舊演習如所請行八年因病奏請開缺

佟鑑

佟鑑佟佳氏漢軍鑲紅旗人嘉慶二十五年襲世管佐領道光十一年授印務章京十二年擢副參領十九年陞參領二十六年遷印務參領咸豐元年陞鑲黃旗蒙古副都統三年三月以孝和睿皇后梓宮奉安昌西陵禮成加一級八月粵匪分股由江南犯河南竄山西命佟鑑選帶漢軍八旗神威銅礮並礮兵護礮槍兵等偕新任山西巡撫恆春前往堵剿九月賊由山西竄直隸欽差大臣勝保等追剿抵深州偵知分踞州城之賊將圖出竄豫設伏擊之賊猶困鬪適佟鑑運礮由山西折回至營遂率弁兵轟礮助戰燬其壘賊披靡殪二百名餘賊遁與全股合十月賊由靜海青縣竄天津之獨流鎮分踞楊柳青等處佟鑑偕勝保督隊踵至襲擊於楊柳青賊猝不及防轟斃二百餘名俘馘三十餘名沿河溺斃無數奪獲船械馬匹甚夥尋合攻獨流賊傾巢出拒總兵達洪阿等於東西岸分隊衝擊各殪賊數百賊復馬隊全集勝保率吉林黑龍江官兵赴援佟鑑以神威礮從旁轟擊殲渠二越日大兵分路進攻賊於迤南隄畔蟻聚以待達洪阿等督隊奮擊佟鑑偕總兵經文岱等以大礮及礮船相接應賊死傷枕藉餘賊遁回木城勝保先

後奏聞得旨嘉獎並賞佩刀荷囊等件十一月獨流踞匪合靜海援賊出壘撲營我兵縱橫擊走之賊復傾巢出我兵奮勇轟擊賊不支沿隄鼠竄佟鑑思絕其歸路身先士卒進掣濠板賊死拒佟鑑手刃數匪以路滑失足踏地賊刃蠶集遂歿於陣奏入諭曰鑲黃旗蒙古副都統佟鑑管帶礮位累次擊賊疊著戰功此次接仗業已轟斃賊匪數百名乃因拽取濠板被賊擁圍猶復手執長矛連刺數賊身受重傷登時遇害忠勇血誠覽奏不禁隕涕著加恩追贈將軍卽照將軍陣亡例賜卹入祀昭忠祠並賞給二等輕車都尉世職仍准其入城治喪應得卹典該衙門察例具奏該員見無子嗣著該旗於本族近支內擇其應繼之人卽爲立嗣承襲世職並著於陣亡地方建祠置祀以慰忠魂尋賜卹如例入祀京師昭忠祠予諡剛節四年賊分竄山東德州練勇獲賊王小湧訊係戕害佟鑑兇渠卽伏法並於德州城外設佟鑑位以祭經山東巡撫張亮基入奏諭傳知佟鑑家屬俾自行告祭以慰忠魂是年二月遺腹子佟澤沛生由本旗都統奏聞得旨承襲二等輕車都尉世職並襲世管佐領同治元年穆宗毅皇帝御極追念死事諸臣各賜祭一壇佟鑑與焉子佟澤沛襲世職

達洪阿

達洪阿姓富察氏滿洲鑲黃旗人嘉慶十八年以烏槍護軍隨征河南教匪洊擢藍翎侍衛二十一年以射中五矢賞三等侍衛二十三年授江西南昌城守營都司道光四年陞福建寧鎮標右營遊擊九年擢同安營參將十四年三月陞浙江紹興協副將十月陞貴州威寧鎮總兵十二月調福建漳州鎮總兵十五年調臺灣鎮總兵十八年以剿辦嘉義縣匪徒沈和等事竣賞戴花翎十九年復獲匪徒胡布等首從各犯審明正法上嘉其辦理迅速下部優敘二十年上以達洪阿調任臺灣五載訓練操防諸臻妥協賞加提督銜二十一年八月英船駛至臺灣攻擊礮臺達洪阿與臺灣道姚瑩督兵擊之沈其船擒斬多人獲礮位圖冊疏入上甚嘉之賞換雙眼花翎仍下部優敘九月英船復至淡水雞籠口門擾及三沙灣又擊敗之是時嘉義鳳山土匪乘間起卽分兵馳剿獲股首江見吳慈等事平得旨嘉獎並賞騎都尉世職二十二年英船駛至淡水彰化交界之大安港外洋意欲入口達洪阿使軍士等誘令從土地公港駛進擱於暗礁船欹入水會伏發擊破之英兵皆落水其竄至漁船者又擊斬殆盡奏入諭曰覽奏欣悅大快人心

該英人窺伺臺灣達洪阿等以計誘令其船淺擱破舟斬馘大揚國威智勇兼施不負委任著賞加太子太保銜並阿克達春巴圖魯名號旋疊奉廷諭此次生擒白人紅人及漢奸其中必有洞悉夷情之人訊令據實吐供由五百里覆奏取供之後除頭目暫行禁錮候旨辦理外均著即行正法以快人心尋奏英軍官顛林供稱此次大小船百餘隻實在兵船連火輪船七八十隻內多貿易之船配以軍官作爲兵船其兵皆黑人雇自各島約四五萬人每月工資番銀二三圓至十圓不等臣伏見該國兵船半卽商舟人衆數萬月費工資數十萬合頭目俸銀兵衆口糧軍裝火藥月費亦數十萬船本貨本又數百萬犯順二年費已不下二千萬彼以貨財爲命今閉關貨物不行所在私售無多價亦大減主客異形英人雖富何能久支樸鼎查始冀如義律故智思得所欲及不可得且人船喪失所耗益多其情勢必絀飢而撲食乃更揚言大舉竊恐其勢將離未必復能久持也二十三年三月以英人於就撫後訴稱達洪阿等妄戮遭風難民作爲接仗俘獲朦混奏報兩江總督耆英奏請將達洪阿解部審辦耆英又奏會詢浙江提督李廷鈺及四品京堂蘇廷玉謂英船實係遭風非無端肇釁請敕交閩浙總督怡良查辦上

命怡良渡臺確查怡良旋查明兩次英船之破實因遭風沈擱並無與之接仗及計誘等事奏請治罪諭曰此事原在英人未經就撫以前即使激於義憤據實入奏朕自有辦理之法乃欺飾冒功情殊可惡一稱接仗一稱計誘直至怡良渡臺始呈遞親供認罪殊屬辜負朕恩達洪阿著革職解交刑部派軍機大臣穆彰阿等會同審訊定擬具奏八月訊明奏上復諭曰達洪阿等原奏僅據各屬稟報並未覈實率行入奏本有應得之罪姑念在臺有年於該處南北兩路匪徒屢次滋擾均能迅速肅事尙有微勞足錄達洪阿加恩免其治罪十月賞三等侍衛充哈密辦事大臣十二月賞副都統銜充伊犁參贊大臣二十五年七月命馳往甘肅查辦事件九月授西寧辦事大臣二十六年六月偕陝甘總督布彥泰等剿辦黑錯寺番匪上以達洪阿身先士卒不遺餘力下部優敘並諭曰番匪抗拒官兵經達洪阿帶兵攻剿焚燬莊寺該逆仍敢竄匿果岔地方希圖有險可踞復經達洪阿督兵追擊埽蕩窩巢計烏合之衆殲除殆盡見在拉布魯等收合散還番族帶到營盤匍匐乞命經達洪阿嚴立條約准令自新官兵即日凱撤所辦可嘉之至達洪阿著賞戴花翎十二月以舊疾復作奏請開缺回旗調理允之三十年五月

病痊署鑲白旗滿洲副都統旋授鑲黃旗蒙古副都統七月授右翼總兵九月署正白旗護軍統領又署鑲紅旗滿洲副都統十一月調鑲白旗滿洲副都統先是文宗顯皇帝御極以大學士穆彰阿傾排異己詔數其罪諭曰如達洪阿姚瑩之盡忠盡力必欲陷之蓋指臺灣之事也咸豐元年三月廣西賊起上命偕都統巴清德隨大學士賽尙阿前往剿辦六月抵廣西省城疏陳汰兵勇明紀律購間諜散賊黨斷接濟行團練等事奏入上以籌畫均合機宜特賞黃馬褂時賊據紫荆山前以新墟爲門戶後以豬仔峽雙髻山爲要隘賽尙阿飭達洪阿偕總兵秦定三李能臣經文岱等分路攻新墟達洪阿攻其西南自辰至未殲賊四百餘焚其礮臺越日巴清德等先後奪豬仔峽雙髻山隘口奏上諭曰達洪阿及各鎮將等圍攻新墟均能同心戮力奮勇爭先見已奪據山後要隘勢若建瓴前路攻剿自更得手計日埽穴擒渠卽當同膺懋賞八月以舊疾復發請在潯州調理諭曰達洪阿自抵軍營以來奮勇剿賊不辭勞瘁以致舊疾復發朕心實深眷念著毋庸仍留軍營卽來京安心調理病痊照舊在京供職二年二月署正紅旗漢軍都統四月署正黃旗護軍統領九月署正白旗護軍統領三年九月粵賊犯直隸命達

洪阿選八旗兵馳赴臨洛關偕侍郎培成慶祺副都統多爾濟那木凱等併力剿捕時欽差大臣勝保等敗賊於楊柳青賊遂竄擾靜海獨流兩處十月達洪阿隨勝保抵獨流以大礮擊賊傾巢出我兵分東西兩岸擊退之復率健銳火器各營兵合諸軍進攻四戰皆捷燬賊壘十餘處得旨嘉獎十一月勝保赴下西河令軍中列陣嚴待時逆匪分股出撲被我兵擊敗正追剿間副都統佟鑑足滑踣地賊蠡擁回擊天津縣知縣謝子澄單馬救之皆陣亡候選知府朱鎮亦中槍傷賴官兵大至賊始竄回時達洪阿督北路兵先退上以達洪阿始則貪功銳進繼則輕退失機命革職交勝保差遣責令帶罪自效四年二月賊南竄獻縣達洪阿迎擊於西門橫截賊陣殲戮甚夥奏入開復原官三月與將軍瑞昌等攻賊於阜城縣達洪阿戰尤力身受槍傷猶裹創督戰遂患病特賞如意拔毒散交其子戶部員外郎穆克金布賚往看視尋卒於軍諭曰鑲白旗滿洲副都統達洪阿由火器營烏槍護軍校歷陞總兵嘉慶年間曾征滑縣道光年間防堵臺灣均有勞績經朕簡任副都統右翼總兵派往廣西帶兵因病召還此次剿辦直隸境內賊匪先因失挫獲咎旋因出力卽予開復該員衝鋒陷陣奮勇可嘉昨因身受槍傷猶復

裹創力戰當賞伊姪孫福成二等侍衛並賞給藥料命伊子穆克金布前往看視方冀調理速痊藉資倚畀茲聞溘逝軫惜殊深著加恩賞加都統銜卽照都統陣亡例賜卹准其入城治喪任內一切處分悉予開復應得卹典該衙門察例具奏伊子員外郎穆克金布著俟百日孝滿後由該旗帶領引見尋賜卹如例予諡武壯賞騎都尉兼一雲騎尉世職襲完時以恩騎尉世襲罔替同治元年穆宗毅皇帝御極追念死事諸臣各賜祭一壇達洪阿與馮子穆克金布戶部員外郎襲世職

霍隆武

霍隆武鈕祜祿氏滿洲鑲紅旗人福州駐防由前鋒中武舉道光五年署前鋒校十年陞正黃旗驍騎校十六年遷正紅旗防禦十七年陞正白旗佐領二十年陞鑲白旗協領二十三年至二十四年疊奉檄赴廈門督辦夷稅事務二十五年以辦理稅務認真賞戴藍翎二十六年俸滿引見得旨交軍機處記名二十七年調水師旗營協領二十八年軍政卓異加一級咸豐元年擢江寧副都統二年署江寧將軍時廣西會匪洪秀全等竄擾湖南北旋陷武昌省城三年正月復沿江下

駛由安徽竄江寧欽差大臣兩江總督陸建瀛棄九江退回省城江蘇巡撫楊文定由省移駐鎮江民心益恐霍隆武偕江寧將軍祥厚江南提督福珠洪阿江寧布政使祁宿藻合疏參奏並陳守禦情形略言督撫臣首鼠兩端進退無據以致省城震動雖有駐防旗兵同仇敵愾無如兵力過單賊船順流揚帆旦夕可至情勢萬分緊迫見督同司道及八旗協領等官激勵兵民竭力防守請敕統兵大臣提督向榮等迅速督軍馳繞賊前協力堵剿以固省城根本而維南北全局奏入逮建瀛治罪以祥厚代其任霍隆武等疏甫上賊已連檣駛撲江寧霍隆武偕祥厚等登陴戰守歷十餘晝夜二月外城陷仍與祥厚力守內城於小門地方策馬督戰霍隆武被賊鉤墮受傷力竭歿於陣事聞諭曰逆匪自武昌潰出竄入江省直撲金陵經祥厚等督率文武官兵登陴守禦竭十數晝夜之力旋因城大兵單應援不至省城失陷祥厚於外城陷後力守內城騎馬督戰身受數十傷殞命副都統霍隆武與該將軍同在小門督戰被鉤落馬身受數傷遇害亦慘霍隆武著照副都統陣亡例從優議卹以慰忠魂尋賜卹如例贈都統銜予諡果毅入祀京師及陣亡地方駐防省分昭忠祠賞騎都尉兼一雲騎尉世職襲次完時以恩騎

尉世襲罔替同治二年金陵克復上追念江寧京口駐防死事諸臣命於江寧京口旗營分建昭忠祠霍隆武與焉孫普存襲世職

烏蘭泰

烏蘭泰索佳氏滿洲正紅旗人道光六年由外火器營烏槍護軍隨征逆回張格爾於喀什噶爾有功陞藍翎長十五年擢護軍校十八年陞副烏槍護軍參領二十年遷參領歷陞營總翼長二十一年以英人不靖隨御前大臣科爾沁郡王僧格林沁查閱天津海口二十三年坐失察火器營碾藥火發轟斃兵丁革職留任旋以製造火藥得力下部議敘二十七年軍政卓異旋擢廣州副都統咸豐元年二月廣西會匪洪秀全等倡亂命馳往幫辦軍務四月抵廣西時賊踞武宣州經大兵圍困將次殲滅復乘間竄入象州烏蘭泰自請治罪上以其甫到廣西免議尋命偕提督向榮節制廣西鎮將及各省徵調官兵五月督貴州三鎮兵由羅秀移營梁山村距中坪賊巢四五里許賊乘我兵駐營未定蠶擁進逼烏蘭泰下令兵毋妄動以火礮火箭隔河擊走之越日賊四五千分十數股渡河撲營礮子如雨烏蘭泰飭官兵伏地前迎自督八旗兵往來指揮礮燬賊巢望樓先擊敗西南

山頭之賊復由獨鼇山腳過橋衝擊鑿戰竟日賊大潰殪千餘人奏入上嘉其調度有方下部優敘是日威寧鎮兵見賊退縮將弁傷亡烏蘭泰復自請治罪諭曰此次我兵逼進賊巢奮勇剿擊逆匪已大受懲創雖小有挫衄究屬罪不掩功且烏蘭泰尙能轉敗爲勝所請治罪之處著毋庸議烏蘭泰據實陳奏具見不欺如能迅速立功仍當加以懋賞七月賊由中坪竄踞新墟莫村等處烏蘭泰令總兵經文岱等由馬鞍嶺攻莫村總兵李能臣等由新羅塘甕窰攻新墟之東南上瑤十八村練勇由羅旺過河直擊新墟其南面之護甲渡令總兵重綸等排隊兩岸自偕總兵秦定三督兵於思盤渡河由西南攻入均約聽候號礮火箭同時前進嗣偵知賊設伏於莫村金田一帶欲俟官兵過河東行四出鈔尾烏蘭泰調護甲渡之兵守思盤大營並多張旗幟設爲疑兵揚言過河而自率兵勇改由護甲潛渡攻莫村賊巢後面將戰賊卽退走烏蘭泰知彼處有竹圍村林木叢雜豫令秦定三伏兵於中每追里許卽鳴金小住偵探再追如此數里賊果由竹圍村前平岡擁出伏發賊潰乘勢窮追賊併竄入新墟是役也一日七捷斬級數千上優獎之賞戴花翎八月賊踞紫荊山大兵分路圍剿烏蘭泰偕秦定三攻其西北殲賊

三四百破雙髻山隘口進攻賊巢先將羅村等三處賊房焚燬賊於風門坳隘口築寨安礮爲拒守計我兵仍分三路攻破之進逼新墟賊傾巢出撲我兵奮勇鏖戰殲五六百人閏八月賊匿大竹圍木寨等處編造木箚潛謀渡河烏蘭泰激勵兵勇分路設伏疊次俘馘無算賊敗退及我兵撤隊賊復悉衆來追烏蘭泰從容下馬以示鎮靜旋麾兵回擊大敗之上嘉其身先士卒有膽有識賞都統銜既又誘賊至困嶺斬馘無算奏入賞穿黃馬褂九月賊竄永安州烏蘭泰李能臣攻破水竇要隘賊營六七百人殲戮淨盡並燬板屋帳房三百餘架又連敗之於石燕嶺銅盤村等處十月攻賊於永安州城暗伏地雷轟斃賊渠會鬪嶺之賊分股來襲我軍復回兵擊卻之十一月復殲賊五六百並黃衣紅衣賊目奪獲馬匹礮械無算自十二月至二年正月晝夜環攻接戰十餘次殲賊目黃滿僞軍師秦姓三月收復永安州生擒逆首洪大全檻送京師餘賊分竄烏蘭泰帶兵追剿因骸受礮傷致失機會命拔去花翎革職留任尋追賊至桂林城下之將軍橋以礮傷過重退軍六塘旋回陽朔卒於軍諭曰都統銜廣州副都統烏蘭泰自上年派赴廣西剿辦逆匪屢著戰功昨因追擊賊匪身受礮傷方冀調理速痊藉資倚任遽聞

溘逝軫惜良深著加恩照都統例賜卹任內一切處分悉予開復並賞銀一千兩由藩庫交伊家屬祇領准其入城治喪烏蘭泰見無子嗣該旗於本族近支內擇應繼之人卽立爲嗣應得卹典該衙門察例具奏旋奉旨照陣亡例賜卹尋賜卹如例予諡武壯賞輕車都尉世職襲次完時以恩騎尉世襲罔替嗣子紹曾襲三等侍衛

克興額

克興額莫勒哲呼氏滿洲鑲黃旗人黑龍江駐防道光六年以驍騎校隨欽差大臣長齡出師回疆七年收復阿瓦巴特賞戴花翎十年帶兵至安集延防守尋補防禦十四年授佐領十七年陞協領二十一年坐失察參領德隆阿等挪用官錢下部議處二十三年俸滿引見命交軍機處記名二十七年二月擢齊齊哈爾副都統十一月署黑龍江將軍二十八年閒散達木察糾集披甲德勒德伯克等越界偷竊俄羅斯駝馬旋卽弋獲克興額偕將軍英隆奏請懲辦並請將該管鄂綽爾圖交部察議從之二十九年奏言齊齊哈爾城倉儲因連歲災歉存倉無幾應由鄰境運米籌補而本城船隻兼資輓運恐誤水師操防請由鄰屬雇覓商船以

速轉運下部議行咸豐元年四月以東三省軍營向無擡槍偕將軍英隆捐廉添設八十桿撥給齊齊哈爾黑龍江呼倫布爾三處各二十桿墨爾根呼蘭二處各十桿奏請由火器營頒給式樣製造演習尤之十一月卒子貴德二品廕生

穆騰額

穆騰額赫舍勒氏滿洲正白旗人荊州駐防嘉慶五年由披甲前鋒隨荊州將軍宏豐赴荊門州防堵教匪十九年授驍騎校二十四年遷防禦道光九年陞佐領十一年三月陞協領九月保陞副將得旨記名先是荊州駐防營額設馬四千匹嘉慶時將軍宏豐疏請裁二千匹經部議駁嗣協領巴克坦布呈明將軍將連年倒馬皮臟銀一萬六千兩作一千匹馬價俟調撥時購補其馬乾銀發給兵丁添補實馬餵養及一切公用歷任照冊辦理至是十三年荊州副都統善英以馬乾短少劾奏經湖廣總督訥爾經額等遵旨查奏實係體恤兵丁別無情弊惟應奏不奏請將經管員弁議處穆騰額降五級留任十九年開復二十二年將軍祿普以穆騰額辦事勇往不辭勞瘁疊於荊江等處查獲礮位礮子奏請獎勵得旨以副都統用尋授江寧副都統二十三年部議酌減外省馬乾銀兩存庫以備撥用

穆騰額偕將軍德珠布等遵旨裁減江寧京口兩處馬四百匹計撙節乾銀八千六十四兩添設礮兵二百名需餉銀二千四百兩由馬乾減項撥給允之二十四年正月護理江寧將軍時以英人就撫議於江寧府城東五龍山添築礮臺以固省城門戶十一月偕總督璧昌將軍岳興阿等入奏如所議行二十五年復議防護礮隄以江寧八旗擡礮移置五龍山及各城門另撥旗庫存款添築擡礮鳥槍歸入旗營又鑄一尺六寸銅礮擇養育兵年壯者隨時演放以備派入營伍得旨允行二十七年十月署江寧將軍十二月以年力就衰原品休致咸豐二年卒子貴順佐領玉魁驍騎校貴強佐領

烏爾棍泰

烏爾棍泰舒穆魯氏滿洲鑲黃旗人由嚮導處護軍校委副護軍參領於道光二十六年陞護軍參領咸豐三年粵匪北竄命偕刑部右侍郎文瑞辦理東路巡防旋擢鑲白旗蒙古副都統九月進巡防圖樣尋管理鑲白旗蒙古新舊營房十月以籌辦巡防認真賞戴花翎四年正月由通州移駐良鄉三月命赴涿州幫同防堵尋拏金有等六名訊有從賊情事治如律五月奏通州團練著有成效並將圖

樣進呈諭曰通州爲畿東門戶經烏爾棍泰等勸諭紳民舉行團練地方藉資保衛著確加查覈擇其尤爲出力之紳耆酌量奏保七月奏請獎勵團練人員詔如所請八月充進武職六班十月以揀選世職錯誤經怡親王載垣等參奏降三品頂帶在鑾儀衛章京上行走五年五月擢正紅旗漢軍副都統十二月授內閣學士兼禮部侍郎銜並充八旗值年大臣六年四月調正紅旗滿洲副都統十月管理右翼幼官學七年正月署稽察寶坻等小四處事務二月歷充考驗右翼軍政大臣稽察內七倉大臣四月署禮部左侍郎八月三月命往天津辦理洋務並赴山東籌防河道五月因挑築減河工程奏請將捐資各員獎勵下所司議行六月天津洋務完竣奏請先行回京允之旋於途次病卒遺疏入諭曰內閣學士正紅旗滿洲副都統烏爾棍泰前經派往天津辦理洋務嗣赴山東幫辦河道事竣回京因病在途出缺歿於王事殊堪憫惻著加恩照副都統例賜卹並准其入城治喪應得卹典該衙門察例具奏尋賜卹如例子瑞祥欽天監筆帖式

向榮

向榮甘肅固原州人原籍四川以行伍隸陝甘固原提標拔外委嘉慶十八年隨

剿河南滑縣教匪攻克道口鎮經欽差大臣那彥成保奏賞戴藍翎六品頂帶二十一年陞前營把總道光元年遷千總二年西寧野番擾青海榮隨征出力經陝甘總督長齡保奏得旨以應陞之缺陞用四年三月陞陝西寧陝營中軍守備七月陞靖遠協中軍都司六年隨剿逆回張格爾七年官軍破賊十餘萬於阿瓦巴特回莊旋於蘭山兜剿安集延匪衆殲其渠榮均在事出力賞換花翎八年回疆底定凱撤回任九年調金鎖關都司十二年陞寧羌營遊擊十三年正月調甘肅鎮羌營遊擊時直隸總督琦善以直隸各營將領多未經行陣之員奏調陝甘員弁赴直隸補用藉資教練榮與焉八月補直隸督標前營遊擊十八年陞提標中軍參將二十年陞開州協副將二十一年以英人犯順各海口調兵防守尋英船退出廣東虎門裁減防兵直隸總督訥爾經額奏請令榮帶留防官兵仍駐山海關協防二十二年正月擢正定鎮總兵九月英人就撫上以直隸各文武籌防兩年各予獎勵榮下部優敘並賜緞匹十二月調通永鎮總兵二十七年擢四川提督三十年二月調湖南提督時湖南逆匪李沅發滋擾粵楚之間屢潰屢振竄新寧縣金峰嶺負險抗拒榮由武岡州馳抵楚粵交界剿敗之五月李逆就俘下部

優敘七月調陝西固原提督八月奏請改歸四川大寧縣原籍允之時廣西會匪洪秀全等稔亂先後竄擾修仁荔浦遷江等縣勢甚張上調榮爲廣西提督會同巡撫鄭祖琛籌辦九月賊犯賓州遊擊成保擊敗之賊首陳亞潰乘間竄豬仔峽紫荆山榮會剿擒之及其弟陳大交會鄭祖琛以釀寇梟職欽差大臣暫署廣西巡撫前任雲貴總督林則徐卒於途榮遵旨偕欽差大臣前任兩江總督李星沅署廣西巡撫周天爵會籌剿賊十一月賊竄擾武緣賓州慶遠等處榮赴慶遠府迎剿賊二千餘踞龍門司之索潭墟榮破之殲賊數百乘勝縱火圍攻賊被焚及落崖死者無算奏入上以榮甫經到粵卽能身先士卒激厲將弁忠勇可嘉優旨褒獎十二月索潭墟敗匪竄至八旺踞險抗拒榮揮兵奮擊殲賊三百餘餘賊潰竄追及於陶鄧墟覃村獲陳亞潰之父陳勝賊旋擾宜山縣及墟城土司榮往剿密於北山墟設伏至猶山村賊由山後擁出我兵夾擊之殲賊數百賊沿山潰移師剿橫州陶墟之賊賊四千餘聲言投誠榮知其詭謀逼攻其巢賊恃衆抗拒鏖戰兩時復誘之離巢三面環攻榮親冒矢石士卒勇氣百倍追殺三十餘里俘賊數百人各路團兵亦截戮六百餘人並獲賊渠誅之捷聞諭曰向榮督兵轉戰一

間四獲勝仗洵屬奮勇可嘉著先行交部從優議敘尋賊踞桂平縣之金田
被剿後竄平南之思旺堆我軍擊敗之退至思宜渡口榮移兵往捕咸豐元年
正月賊分踞大黃江一帶榮進攻殲數百人燬賊屋多間乘勢進追賊暗伏地雷
左右鈔截我軍槍礮齊施又殪數十人賊回巢拒守二月賊分股詐誘我兵榮令
雲貴官兵移紮佛子口親率楚兵赴夾洲搜剿賊詐退由金匏村出撲大營官軍
擊卻之榮慮其另有詭謀嚴陣以待賊果分三大股來突榮率總兵李能臣周鳳
岐等合兵進攻榮子廕生向繼雄堵其北賊伏南面竹林內榮督戰自寅至午殪
賊多名湖南都司龍金源復然礮轟之乘勢衝入殲其渠賊大潰是役也共殲千
數百人獲礮械無算捷入上嘉其有謀有勇不負委任賞霍欽巴圖魯名號尋剿
牛排嶺之賊誘賊離巢水陸夾攻火其屋及船賊伏匿圖竄榮乘夜潛赴北岸以
火箭焚賊屋兵勇擁上江岸親率大軍往圍之賊不能支宵遁遂燬其巢復追敗
之於新墟紫荆山等處賊竄踞武宣東鄉山徑叢雜榮力戰數時賊大蹙三月會
剿賀縣股匪及上林墟之賊敗之時太平龍州各屬均有賊竄擾榮嚴飭鎮道會
剿防其滋蔓五月武宣之賊突圍竄入象州欽差大臣大學士賽尙阿奏入上責

諸將相持日久仍任賊竄逸榮褫花翎降三級留任賊首凌十八先由廣東石城縣逸入廣西圍攻鬱林州榮往剿大敗之追擊於廣東化州之平定墟又剿博白縣賊劉八等乘勝追至廣東合浦縣境敗之於香山竹根坡並飭貴州威寧等三鎮兵禦賊於象州之羅秀賊鋒大挫六月武宣之賊踞象州中坪一帶榮由桐木進營中坪之東偕幫辦軍務廣州副都統烏蘭泰總兵經文岱四面環峙賊數千由馬鞍山出撲我兵分路轟擊賊旋分十數股渡河我軍進燬賊巢望樓賊驚潰我兵益奮擊戰四時許殲賊千餘賊仍踞中坪等村榮營於界嶺防其分竄令湖南總兵李伏等渡河攻剿署參將成安巡河口搜其伏賊由嶺後突出李伏奪上山梁斬僞先鋒余安榮獲賊諜知賊渠洪秀全欲撲營遂乘夜設伏於架村左右賊果以四五百人由中坪來犯榮分兵五路齊進見架村火起橫擊之副將和春博春都司鄭魁士等繼進殲僞先鋒方梅賊大潰其苦瓜嶺西安村等處之賊仍迎拒榮督師合擊適李伏鈔出賊後併力夾攻一日三勝賽尙阿奏入上以榮督率有方嘉之賊回竄東鄉並分竄桂平縣之新墟榮偕烏蘭泰等節次追剿賊反撲榮策馬當先殲賊先鋒二人馬傷欲仆易馬決戰勝之復追斬數十級奏入諭

曰此次賊匪因北路嚴堵竄回舊巢向榮節節追擊屢有斬獲奮勇衝鋒身先士卒實屬壯往可嘉著賞戴花翎時賊踞紫荆山前以新墟爲門戶後以豬仔峽雙髻山爲要隘恃險負隅烏蘭泰進攻新墟榮率候補知府陳瑞芝攻其後路破賊柵五奏入榮以督率有方下部優敘七月烏蘭泰復圍攻新墟榮偕都統巴清德由紫荆山後路進豫遣兵由間道越山至豬仔峽雙髻山各隘口繞賊上路飭總兵劉長清等分路併擊榮偕巴清德由中路攻豬仔峽賊於峽內設伏阻截木石槍礮疊發我軍奪據豬仔峽要口雙髻山賊見我兵奪其要隘鬪益力我軍併力攻之燬賊巢望樓復上下夾攻賊大潰我兵遂據雙髻山巔爲營賊由間道南竄追奔三十餘里捷聞上嘉榮紀律嚴明身先士卒開復降級留任處分仍加軍功一級賜荷囊玉鞞等件尋偕巴德清營於界頂賊撲營擊敗之焚冷田村賊房積聚我軍前後兩路直迫新墟賊益不支洪秀全等匿新墟後莫村等處八月仍兩路偪近新墟自我兵奪據紫荆山隘賊於風門坳口築安礮位穹斷山梁爲負隅計我兵分三路銜枚疾走直至山下味爽齊進殲賊百餘賊棄隘走破之奪風門坳隘口追十餘里賊落崖死者無算敗入古調村追甫及伏賊突出副將和春等

敗之克古調村焚其巢賊乘夜越山三次刦營總兵長瑞等擊走之賊乘風縱火忽反風燔賊營榮帥師前進賊屢出屢敗追至古林社殲賊渠韋亞孫等疏聞上嘉獎之下部優敘我軍既攻破風門坳口仍兩路圍攻新墟榮密遣兵焚古林社分兩翼沿河進賊三千餘分七隊傾巢出拒我兵焚其望樓賊復分踞山梁五處榮督諸鎮分擊短兵相接殲兇悍賊目斬級三千餘賊焚巢遁我兵追剿復敗之殲僞軍師周錫能俘僞司馬楊繼滄賊由藤縣和平墟竄逸榮偕巴清德截賊前路會大雨賊反撲諸軍失利於官村榮褫職留任閏八月賊突陷永安州榮以軍械損失未能急追摘頂帶褫花翎九月賽尙阿以榮因官村挫失頓兵不進又稱病回省月餘始繞抵平樂疏劾其諉卸延誤得旨褫榮職責令隨營效力十一月我兵南北兩路疊攻永安州榮督兵移營涼亭議合力大舉諭曰向榮病已痊愈既知感激朕恩力圖報效著賞給三品頂帶飭令迅速進剿榮遂赴北路統調各鎮進營龍眼塘衝口等處賊乘我營壘未定來犯榮擊敗之賊復傾巢出撲榮嚴伏以待賊至發火器伏兵應之賊敗走河岸榮率劉長清等張左右翼渡河疊戰復會南路諸軍進攻殲賊二千賊大挫奏入得旨向榮親冒矢石激厲兵勇人人

用命實屬知感知奮著卽開復廣西提督原官並賞還花翎時永安之賊抗拒日久諸軍移營進逼榮由排頭口攻河岸之賊尋從牛頭洲江神廟渡河攻賊營燬所踞村落屢戰屢勝遂與南路諸軍合擊殲賊渠軍聲益壯二年正月攻賊西礮臺守東礮臺之賊來援參將馬龍被傷馳馬大呼兵勇乘之賊潰遂攻東礮臺誘賊出巢短兵衝殺賊敗退復燬其小礮臺二月仍由北路圍攻賊巢奪據三座小山追至馬背嶺轉截賊後又於摩天嶺對岸轟擊均敗之時暴雨連旬賊冒雨突圍東竄我兵追剿俘逆酋洪大全檻解京師遂復永安州旋因山險路滑總兵長瑞等追賊失利陣亡上責榮等銳進失機奪職留任賊由永安竄出犯桂林省城榮聞變由間道馳抵桂林偕巡撫鄒鳴鶴嚴禦固守賊屢撲城擊走之三月節次遣兵敗賊於城外俘戮數千焚賊所占房屋獲攻具無數賊驚退不敢附城又敗賊於河岸殲其目諸軍由飛鸞橋至五里墟欲鈔賊後會大雨賊乘夜於文昌門得月樓下堆土袋爲礮臺轟缺女牆數處勢危甚榮急赴缺處亦用土袋疊集女牆內賊礮不能穿下令緹城擊賊者予重賞應者百餘人譟而前占賊礮臺奪長梯四十架賊大隊來犯我兵退至城根城上火器應之賊不能進宵屯對河其分

犯北門南門文昌門之賊均經我兵擊退城內復出奇兵敗賊於五里墟襲賊後由麗澤門至馬拐橋攻古牛山水陸並擊連敗之賊宵遁先是省城援兵未集守禦單薄城中諸將多驚愕榮力言可守狀人心始定至是圍解上以榮保守桂林功予開復並下部議敘擢其子繼雄同知八月兩廣總督徐廣縉奏劾榮藉病規避得旨褫職遣戍新疆時賊由興安全州竄湖南犯道州郴州永興等處趨長沙省城榮奉檄剋期赴援經賽尙阿奏入諭曰該革員此次遵調來楚尙爲迅速著暫緩發遣卽令統帶官兵帶罪圖功以觀後效九月賊由妙高峰至瀏陽門外分撲我營榮以敢死士縋城出剿賊卻退復夾擊之賊死傷枕籍分股圖竄榮由見家河敗河西分股之賊遂渡河追至漁網洲連破賊壘並轟城南賊巢與諸軍合剿偵知賊糧盡偷渡密遣兵營河西岸連破賊地道抵嶽麓山賊踞險力拒榮飛騎馳至嚴令督戰我軍上下夾擊賊敗竄回巢十月賊以被剿窮蹙解省城之圍渡河西竄榮與諸軍分路追剿由寧鄉鈔出賊前遏其北竄常德之路十一月賊竄陷岳州府榮率總兵常祿等赴援攻克岳州賊大股已他竄榮率兵急追賊由水路順流直下陷湖北蒲圻漢陽犯武昌省城上以榮屢保危城緩急可恃免其

發遣給還提督銜幫辦軍務命迅馳援武昌時賊踞江面榮追及大破之十二月復授廣西提督賊自抵武昌分股四面竄擾由東門外之洪山至南門外江岸連營數十座榮令總兵福興等徑偪洪山紮營親督兵於白水嶺拔營由長虹橋一路轉戰而進繞赴東路營於魯家港派兵進攻盡燬賊壘乘勝追至城下賊竄江岸我兵已斷其浮橋賊奔無路回拒復擊敗之並分兵於上游荆襄下游黃蘄各路截剿尋賊由西面平湖文昌各門掘地道轟發地雷守陣兵潰武昌遂陷事聞褫榮職仍幫辦軍務尋署湖北提督時欽差大臣徐廣縉以失機債事褫職逮問復諭曰向榮自抵軍營兩載有餘雖不免挫失而桂林長沙兩處守城均能迅速赴援追賊湖北亦係該員先到朕用人略短取長毫無成見但能勇於任事即可承受朕恩向榮著卽授爲欽差大臣接受關防賞還提督頂帶專辦軍務三年正月進攻武昌鏖戰六時克東南二門賊棄城遁遂復武昌榮率諸軍追剿乘賊爭渡擊敗之於江岸賊竄漢鎮下游復敗之於葛店焚其船晝夜兼程馳抵九江冒雨行泥淖中繞出賊前擊沈先至賊船多隻賊大股繼至又擊敗之奏入得旨嘉獎尋授湖北提督時賊由九江東竄陷安徽省城復由太平府四合山順流下二

月犯江寧省城伏地雷轟儀鳳門城陷榮由六合渡江馳剿賊復分陷瓜洲及鎮江府榮追賊至江寧駐軍孝陵衛防守江南賊踞江寧後於土城一帶連紮多營榮乘夜進攻賊棄營走嗣乘我兵築壘復麕至榮疊次擊敗之賊退守不出三月襲通濟門外賊營令各軍四面環攻賊不及防燬其營三座殲除殆盡城內之賊復出通濟門來援均經我軍擊退賊大創奏入上嘉其調度有方賞白玉搬指白玉翎管綠玉煙壺各一尋乘夜襲七橋甕賊營遣兵左右涉河進至橋頭賊驚拒我兵乘霧縱火破賊營四奪據其壘進營七橋甕賊潰圍出者悉殲之疏入上以統師奮勇膽氣尤壯嘉之時鍾山及報國寺賊營爲我軍從中隔斷榮豫伏疑兵並令各軍偪賊營縱火賊驚潰復敗城內援賊三千餘追至朝陽門賊閉城不出我兵乘月夜燒其營賊知不守自焚鍾山明陵亭殿各壘竄至朝陽正陽各門爲退守計我軍遂奪據鍾山捷入得旨向榮自到金陵運籌制勝悉合機宜賞穿黃馬褂四月分攻通濟朝陽門連勝之榮進營紫金山賊以我軍占據形勝出數千人來奪榮揮兵縱擊賊遁回其長江上游之賊亦經疊次擊敗焚賊船數百燬礮臺望樓時我軍於江寧城外結大營十八座榮令一律移近城垣以聯聲勢乘夜

伏兵城邊以火箭射入賊渠楊秀清登城見朝陽門賊衆疑係官軍遂自相轟擊人聲鼎沸達旦始息尋奏江寧城南四十八社團兵防守嚴密請照官軍例發給壯勇糧米允之五月賊由安徽分犯河南歸德一帶上以榮擁重兵未能收復一城致賊另股北竄嚴旨切責七月榮令已革提督鄧紹良攻江寧聚寶門都司張國樑攻雨花臺賊營和春等剿鎮江之賊戰於觀音山均大敗之尋以保奏副將明安泰等各缺不符下部議處十月賊船駛入蕪湖犯高淳縣窺伺東壩官兵擊走之榮以東壩爲蘇常門戶令鄧紹良扼要堵剿十二月令遊擊張國樑總兵吉順分攻江寧朝陽門左右總兵秦定三攻中路榮以大兵乘之士氣百倍越濠仰攻賊由明陵山後出五六千人來援遇伏敗走我軍躡上山梁殲賊數十賊奔回太平門復追戮無算尋以官兵請領餉銀未由該管官稟辦榮坐約束無方下部議處四年七月賊由高淳犯東壩窺內河榮遣副將傅振邦等剿敗之沈其船賊退回高淳築壘爲久踞計我兵於港汶內潛襲其礮臺舉火焚之賊驚潰爭船以濟我軍進戮百數十人燬賊船數十遂復高淳縣東壩上下一律肅清金陵之賊因我軍分兵東壩乘虛撲七橋甕附近營盤我軍潛從上游繞出賊後敗之賊由

洪武門突出數千我軍縱擊復斬馘數百賊竄回旋於朝陽太平二門分左右來撲都司銜陶茂森首先陷陣諸軍乘之將軍蘇布通阿扼七橋甕橋口參將張國樑親入賊隊手刃賊數十賊大亂俘戮三千餘獲僞丞相譚應桂閏七月總兵葉長春吳全美率舟師抵下關克賊水柵二礮臺七繞賊後橫江截擊賊船自三山江面下駛進退無路墮水死者無算奪賊船數百礮殪逆首僞燕王秦日綱遂進扼三山營江面賊水陸不通嘯聚太平府並築壘分踞江寧城外以通太平往來之路榮設伏分攻連克其壘賊自城中出拒張國樑衝入賊陣諸軍繼之賊被撲落濠伏兵一鼓登城遂克太平府殲賊渠韋得真等逸出之賊亦焚溺殆盡時金陵踞賊出營於上方橋一帶榮扼通濟門雨花臺要路別遣兵焚賊營三座沿河敗援賊數千賊撲七橋甕大營我兵迎擊殲賊千餘並賊目九賊驚走尋賊從上游對岸紮筏至上方橋左又作浮橋渡過土山分三路突入高橋門榮迎戰衝擊賊敗走各軍從旁鈔至夾擊之追至上方橋賊不敢渡多徧溺其已登浮橋者亦被轟落水河流盡赤殲渠賴四秀賊乘夜於兩橋紮簿偷渡築兩營我軍破之平明賊過橋來援背水而陣我兵又敗之賊過橋遁未及渡者搜殺無遺先後殲賊

二萬餘其鎮江之賊亦屢經官軍擊敗八月連攻上方橋賊營九月破之燬賊營八座遂由東岸橋渡進偪雨花臺東賊營殲其目及守牆賊燔賊軍資火藥賊來援遇伏敗退榮令副將張國樑直擣雨花臺賊巢署將軍福興爲接應破賊卡六乘勢奪上山梁燬其營柵礮臺賊竄入蘆葦中我軍追至城根俘戮無算墜濠河溺殺者又數百人賊復由觀音門衝出撲棲霞一帶榮令總兵德安乘夜追剿戰於橋頭至高資汛渡河與水師夾擊戮賊渠楊正潮賊大潰由馬步橋登山竄逸提督余萬清方赴高資迎剿與賊遇戰敗之賊遁新開河渡口又敗之於夾江會德安由馬步橋追及合戰賊潰追戮殆盡余萬清等又連敗鎮江賊於北固山金山等處時湖北敗竄之賊由蕪湖犯徽州寧國二府榮令鄧紹良禦於黃池十二月破賊萬餘五年正月復十餘戰均大敗之金陵之賊自上方橋被剿後防守益堅榮穴城進攻破城垣二丈及城堞數處守陣賊多震落二月瓜洲之賊由鮎魚套夾江竄至高資沿江築壘我軍燬其營二座賊由夾江駛出木筏接應我兵截擊賊走句容縣高家邊榮率德安等敗之於福港殲其目賊狂奔復破之於東方橋余萬清從旁鈔襲德安設伏誘之賊自相踐踏潰至河岸溺殺者七百餘人高

資賊壘悉平三月吳全美等以舟師疊敗賊於三山江面沈賊船數百水陸會剿埽蕩賊營五月蕪湖之賊竄犯灣沚我軍奮擊賊敗竄六月吳全美等剿賊於東梁山江面賊拒於夾江我軍進擊沈其船連破賊卡數重焚其積聚遂進徧蕪湖攻南岸援賊遁入小河旋由蕪山出江築壘榮令德安由太平黃山陸路進總兵明安泰出黃池由清水河填溝進破賊卡進攻蕪湖東西兩門德安襲破北門外賊卡都司虎坤元登陴砍開城門三路齊進殲賊數百明安泰等破其水卡至寶塔根賊營徧溺無算會鄧紹良自施家渡截剿移營老鴉山安慶賊萬餘來撲我軍力戰殲其渠鄧紹良等水陸進攻破其犄角二壘攻東南兩門破之並擊燬西門城河賊船攻進北門連破賊壘數重焚踏小河北小山上各賊營是役也水陸殲賊萬餘賊船剿洗殆盡遂克蕪湖縣八月蕪湖上下援賊築壘於弋磯等處我兵乘夜焚丁橋賊卡鄧紹良與吳全美水師合進破賊壘七追至高岡鋪河岸又殲多賊水師復屢斷賊援榮旋飭鄧紹良合水師攻襲戮丁橋之賊數百連破周家山宋家嶺廣福磯賊壘賊沿港竄逸水師攻弋磯燬山北二壘直徧山南賊驚逸賊營悉平十一月金陵之賊萬餘由水路下援榮偕江蘇巡撫吉爾杭阿擊

敗陸路之賊總兵陳世忠等以水師敗賊於燕子磯追至觀音門賊又大敗賊復由龍脖子擁出窺伺榮令總兵張國樑由仙鶴門進攻至甘家港一帶賊來撲我軍縱擊大敗之其分竄東陽之賊在棲霞街焚掠德安偕張國樑等疊敗之棲霞街及石埠橋江邊賊復於觀音門築壘挖濠亦經張國樑等擊殲之並剿敗援賊燬其巢其盤踞蕪湖神山後村之賊經鄧紹良等剿敗又敗之於弋磯江副將李德麟等亦敗賊於神塘河沈其船俘僞官賊遁入河口十二月賊自無爲州糾上游賊船數百來援至荻港遇我水師燬賊船數十焚溺無算追之於劉家渡賊潰逸其應援石壘之賊自陶陽鋪來犯鄧紹良擊卻之又殲范羅山守垛賊賊不支自焚營壘逃竄尋吉爾杭阿攻鎮江金陵之賊由上游渡江來援吉爾杭阿由高資港渡土橋賊竄棲霞石埠橋榮令德安等會合扼剿賊自寶蓋山擁出四五千入我兵奮擊殲千餘賊併入金陵伺隙出擾榮擊敗之於仙鶴門觀音門棲霞橋城中賊由龍脖子直撲濠外我兵鈔截斷其陣首尾不相顧賊敗回巢六年正月賊竄楊家壩陳莊築壘嘯聚欲犯倉頭榮令余萬清總兵虎嵩林等禦之賊由上游繞出倉頭大路分撲我營余萬清等力戰賊卻退又令張國樑扼於丁家橋余

萬清由下蜀街會之斷賊爲兩路敗之又敗之於倉頭街後其三汊河之賊經德安合諸軍直擣其壘焚附近所居房屋疊殲賊日賊大潰尋由倉頭石埠橋窺伺龍潭分犯大營我軍環攻之破韓家村賊壘又敗之於施家村追奔數里斬馘無數二月鎮江之賊竄擾高資吉爾杭阿擊敗之遂攻鎮江榮令鄧紹良擊沿江竄賊敗之於嚴營口姚岡等處賊分股犯下蜀街欲襲我大營虎嵩林設伏敗之余萬清夾擊焚其積聚三十餘所我兵進營和家灣逼攻前港殲賊渠賊奔竄我兵連攻張岡顧家壩焚其壘賊遁劉家莊乘夜襲民便河我兵擊卻之賊由三汊河竄沿江一帶榮令張國樑德安馳赴東陽會剿賊由上游馬橋口屯英隆湖我兵疊擊逼溺無算進抵倉頭賊壘破壘二賊遁其犯龍潭之賊亦經我軍擊敗尋金陵大股賊蔓延炭渚橋頭一帶榮令張國樑等會剿焚賊踞村落五處賊犯下蜀街對山築壘分撲大營張國樑統軍進剿副將秦如虎等扼之於東西堰我軍夜襲顧家壩焚賊壘分攻下蜀街對山破賊壘三又破東西堰賊壘二焚下蜀街洲口賊卡十餘處燬平田新築賊壘另股賊來援我軍擊之連破太平橋大小賊壘賊潰奔三思莊我軍進逼會吉爾杭阿由東西堰馳至合力進攻焚賊船數十下

蜀街炭渚一帶悉平三月張國樑探知三汶河賊窮蹙圖竄德安秦如虎先設伏截剿賊乘雨棄壘逸我兵追擊伏兵四起夾攻殲賊數百石埠橋棲霞賊亦聞風潰我軍由仙鶴門截擊張國樑督大隊會之榮令將軍福興由觀音門沿江追擊三汶河石埠橋棲霞一律肅清時吉爾杭阿攻鎮江與賊遇於煙墩山歿於陣五月賊犯京峴山大營福興張國樑馳至上墟遇賊敗之諸軍由丹徒鎮會合夾攻大敗之焚丁卯橋賊壘寶塔山之賊亦棄營走虹橋我兵三路圍之賊竄楊營又敗之於茅山賊由東陽竄甘家營榮豫令遊擊張玉良扼之於傅家橋賊驚懼遁回金陵尋賊分股陷溧水縣復於龍膊子等處出賊數千窺伺我營榮令副將王浚都司馮子材馳往策應賊突犯仙鶴門營盤王浚等迎剿失利賊圍我軍急榮令遊擊李鴻勳往援賊少卻福興添築營壘於黃馬羣防其內竄賊分數十股來犯張國樑擊敗之紫金山之賊又犯我山角營盤南門通濟門出賊數千應之撲七橋甕大營榮親率官兵剿殺賊乘間突出四五千人越山撲我馬隊營縱火延燒各營相繼陷賊遂犯榮大營張國樑等帶傷力戰殲賊數千諸軍遂由淳化鎮退守丹陽以防內犯榮據實疏陳並自請治罪得旨此次該逆糾衆圍撲向榮一

軍雖因屢經籌撥兵勇過單究屬調度乖方著卽革職拔去花翎仍留欽差大臣督辦軍務尋賊竄陷句容縣榮奏請將逗留不進及遇賊潰散之帶兵各員懲處允之鎮江賊被剿併入金陵後仍欲合竄下撲鎮江諸營榮令諸軍進剿敗之於鎮江南門及丁卯橋磨旗山等處六月金陵賊分踞安徽銅陵縣收買米糧擄船裝載榮檄副將李夢麟率水師抵大橋賊船蔽江下我軍伏鮎魚套叢葉中賊船近伏發逼溺無算銅陵賊來援我軍乘勝登陸鈔襲賊大潰城賊由東門逃逸遂復銅陵縣誅賊渠胡坤元等十三人時鎮江之賊窺伺丹陽築壘屯踞榮令張國樑等攻石橋賊巢又攻和定橋賊敗走又會攻鳳凰岡賊奔和定橋老巢我軍迎擊賊腹背受敵追十餘里遂平鳳凰岡賊壘賊復窺伺東河我軍前後截擊張國樑直攻黃土橋殲其渠賊分竄五里牌黃莊橋偷築營壘張國樑由五里牌上游渡擊散沿河賊黨破賊卡礮臺焚其壘榮復令虎坤元等攻破河東黃莊橋一帶賊壘殲戮殆盡河西之賊經張國樑對河轟擊宵遁是役也共燬賊壘八座俘賊數千人七月卒於軍遺疏入諭曰欽差大臣前任湖北提督向榮由行伍疊次出師滑縣喀什噶爾等處以備弁洊陞專闕超擢提督久歷戎行戰功屢著前因粵

匪肆擾統兵督剿力保桂林長沙等城經朕授爲欽差大臣由湖北追賊直抵金陵雖未能克復堅城而忠勇樸誠士卒用命數年來保障蘇浙並分撥皖南江北等處均能盡心竭力懋著勤勞本年五月因賊衆兵單扼守丹陽猶復力疾督陣誓殄賊氛方冀其會集援兵軍威重振遽聞溘逝痛惜實深披閱遺章無一語計及家事尤見忠忱義憤公爾忘私向榮著加恩開復提督賞還花翎卽照提督軍營病故例賜卹並賞給一等輕車都尉世職應得卹典該衙門察例具奏伊孫向恩等三人著俟服闋後由吏部帶領引見用示朕褒嘉忠盡至意尋賜卹如例予諡忠武復以榮捍衛江南分援各郡爲東南保障命於江蘇建立專祠九年入祀江蘇名宦祠同治元年穆宗毅皇帝御極追念死事諸臣戰功卓著者各賜祭一壇榮與焉三年金陵克復上復追念前勞加恩入祠昭忠祠十三年兩江總督李宗羲奏請於江寧省城合建向榮張國樑專祠詔如所請子繼雄一品廕生候選道賞戴花翎襲輕車都尉世職孫恩舉人賞主事

張國樑

張國樑廣東高要人初名嘉祥陷廣西羣賊中尋自拔率衆投誠改名國樑值廣

西左右江寇盜充斥賊首潘大等竄擾思恩南寧太平三府之交咸豐元年三月國樑率勇堵剿遇賊於土上林墟力戰勝之欽差大臣李星沅以聞並言國樑才可用不但此時大有裨益將來肅清江面非此人不可得旨以千總用賞戴藍翎尋賊首顏品瑤率黨萬人援南太國樑赴剿距養利州數里賊於山坳設伏國樑督勇前進賊蠡擁至山後復出多賊分鈔我軍來路國樑督勇斷後被賊衝突乃單身躍馬而出是役也欽差大臣大學士賽尙阿以國樑雖小挫然其勇往剿賊實堪嘉尙記大功一次並給銀一千兩分賞所帶壯勇以示激勸八月率勇目張鴻才等於僻處設伏突斬顏品瑤於陣並殲擒賊二百餘得旨以守備卽行陞用先換頂帶並賞換花翎顏品瑤餘黨自那曉竄宣化縣之那陳大塘等處那曉距大塘三四十里賊扼險堅守沿途設伏國樑率勇三百夜往誘敵距那曉七八里賊伏盡起施放大礮國樑先於大塘墟外山後叢林中設伏以待我軍惟在山頭鳴角黎明賊見我軍甚寡遂出戰國樑隨戰隨退誘賊窮追賊果長驅而至國樑回拒兩面伏兵齊發賊大敗二年正月賊分屯靈山縣之新鋪那勤恃險爲負隅計各軍疊次會攻不能克國樑率勇千人由佛子坳攻賊巢之西南各營繼之遂

破新鋪賊巢殲賊首顏品喜等南邕一帶肅清時賊圍桂林省城將竄梧州國樑奉檄赴梧州防剿值賊滋擾蒼梧藤縣國樑由南邕行抵平南卽由水路攻擊先後沈賊船多隻殺賊二百餘人賊潰四月賽尙阿以省城東南路之沙子街爲平樂恭城灌陽興安四達之衢飭國樑堵剿時全州城陷旋聞州城火起賊將他竄國樑由灌陽縣直攻全州賊遁遂復全州尋賊由全州竄湖南道州於州城南水門紮營爲賊首屯聚處又於斧嶺洪家村何家村柑溪鋪百嶺頭各要隘結壘抗拒官軍五月國樑會諸軍進逼賊營賊分三路出戰國樑迎剿大敗之六月官軍剿賊至兩家鋪對山地方見鋪後黃旗點動有黃巾黃馬褂賊目數人率衆數千分兩股抗拒國樑麾勇迎擊之於槍礮中見黃馬褂之賊落馬兵氣益奮追殺至兩家鋪賊鋒大挫七月移營靈龕檻大坪頭一帶進剿先派勇目李連陞夜突賊營賊倉猝出敵被礮轟斃多人遂驚走國樑督勇繼至四面圍擊毀賊營過半越月復由小路遶至賊營先於要路設伏親率李連陞等分隊進剿賊營多蓋茅棚我軍火攻之煙燄四塞賊大潰棄營遁伏勇突起賊殲斃及墮死山谿者不計其數會郴州大股賊歸併永興縣永興之賊又分股由安仁縣犯長沙府國樑一面

撥勇赴安仁攔剿一面設計攻永興知城北崇福菴賊營可破乃選精銳二千餘人分爲二隊一隊繞至東北二門外設伏一隊誘賊出復佯退賊偪之觸伏奔潰城中賊出援國樑急麾軍撲城賊驚退國樑乘勢擁入遂復永興縣九月捷入以都司儘先陞用時湖南省城被圍國樑奉檄赴援攻賊於醴陵之丹陵檻賊退踞譚家村分兩股從山溝鈔出國樑麾衆齊進大敗之陣斬僞監軍藍姓殲擒賊目二百九十餘後路之賊剿殺殆盡復率五百人進擊金盆嶺賊營各勇從礮烟中或伏地蛇行拔其牆外毒簽或帶稻草等物鋪地墊腳前行勇目奮勇登牆各勇繼之賊膽益落十月賊自寧鄉竄益陽縣益陽城臨河民船悉爲賊掠其河道由常德達岳州爲湖北咽喉國樑奉檄赴湘陰縣堵截賊由林子口竄撲蘆林潭夜偪湘陰南門外放船渡河適國樑至急飭兵勇沿河擊之賊知不敵棄船遁我軍追之賊大敗三年二月賊自湖北連檣東下犯安慶陷江寧府國樑隨欽差大臣提督向榮移師江南進剿鍾山賊營國樑首先撲至賊牆陣傷左手中指奏入上溫語詢及之七月從高橋門潛襲雨花臺賊營乘夜穿越叢葦十餘處遠聞賊營更鼓聲躡蹤前進繞至雨花臺賊營之後越過賊營外壕其內壕之上密插竹簽

並砍倒樹株爲鹿角柵弔橋亦撤去壕溝深寬國樑命拋擲火罐適我軍火藥以
霉溼不能然賊於土牆內施放槍礮城上賊聞聲亦開礮遙擊我軍不能進越數
日國樑復乘大霧率壯勇數百人夜攻賊卡守卡賊拚死抗拒雨花臺賊營及城
上賊聞之並開礮接應乃整隊而退向榮奏稱國樑自去秋至今大小數十餘戰
前以礮傷手指曾荷溫語垂詢遂感淪肌髓於道途險惡賊營深邃之地疊次進
剿一往無前實屬不可多得請陞補湖南永州鎮中營遊擊允之金陵南門以雨
花臺爲犄角而雨花臺又恃城外大街爲屏蔽自賊竄入後其頭目及粵楚悍賊
皆在街內盤踞互爲援應我軍攻雨花臺賊卽從中街四面包鈔難於得手八月
國樑繞至雨花臺之西豫撥勇三百人至街尾縱火街中賊從火中逸出向雨花
臺而遁國樑擊之後隊繼進賊見我軍攻急堅閉不出國樑豫仿製賊號衣數百
件授親信壯勇於進攻時伏於雨花臺及南門左右俟城內賊出或外賊敗退入
城卽乘勢溷入城中俾大隊奪門而入尋以賊堅守不出策不果行十二月以疊
次力戰賞霍羅誇巴圖魯名號四年五月率隊夜攻通濟門前阻重壕國樑令
善泅者鳧至城下正欲架梯登城賊覺開放槍礮角聲四起城上輒石火罐紛紛

拋擲我軍不能進仍從壕道退回賊乘我軍移動突於聚寶門出賊一股從定河橋來鈔我後我軍各路齊出大呼截剿遂獲大勝賊以我軍於江面疊次扼剿水路不通乃集各處裹脅之衆並上游竄回之賊悉屯安徽太平府城以爲巢穴將所掠糧米停泊內河潛通接濟復於金陵城外西南隅板橋善橋一帶築營分踞以通太平往來之路閏七月國樑選壯勇四百名會合各營由丹陽鎮進兵直抵太平之十里橋探知府城外有賊船千餘隻城中有賊五六千人西南北三面均有內河繞護東路重濠引水中架吊橋旁植梅花椿迤邐紮賊營四座防禦甚密惟中路一線可達城圍國樑謂宜攻其不意將兵勇分爲三隊一隊潛出賊營之後越過梅花椿渡壕伏於城下一隊潛伏賊營近處縱火接應一隊馳近賊營賊盡力迎拒忽見近城火起延燒賊營賊驚顧不知所爲我軍乘勢偪近吊橋國樑首先衝入賊隊兵勇奮力掩殺賊悉墮濠溝殲斃無數國樑督兵衝入城中分投截殺斃賊四五千遂復太平府城八月陞廣東三江協副將九月進偪雨花臺連破賊卡六重東賊營賊抵死堅守屢攻不克國樑以精銳二千人直擣雨花臺連破賊卡六重乘勢擁上山梁焚燬木柵破賊營二座毀礮臺一座十月賊分股由南路竄擾殷

巷馬木橋一帶國樑赴剿賊連夜竄入秣陵關餘賊竄回南門我軍分路進攻秣陵關賊死拒柵門開放槍礮國樑從街頭躍上房屋兵勇繼之拋擲火器斃賊無算賊見我軍已入關內前隊驚潰相率由北關口衝出國樑等與諸軍分路追殺將竄伏關內之賊搜捕淨盡救出被虜難民四百二十餘人五年擢福建漳州鎮總兵時鎮江瓜洲踞賊疊爲我軍所敗而觀音門外龍脖子等處之賊時出窺伺國樑由仙鶴門進攻至甘家巷忽大股賊三四千衝隊而來國樑從後路兜剿縱橫肆擊賊大敗其分竄東陽之賊仍在棲霞街焚掠國樑繞至牌頭巷合各軍分路進攻行至東陽令馬隊越澗奮擊斃賊八百餘賊旋於觀音門挑築壕壘國樑率馬步各隊由東路殺入四面圍攻復斃賊無算六年正月賊於楊家壩陳莊一帶築壘嘯聚意圖闖入倉頭國樑剿賊至丁家邊與各營爭先掩殺賊敗潰復撥兵於倉頭街後兩面縱擊親督大軍分隊衝突盡燬三汶河附近賊壘斬騎馬賊十餘人二月賊疊次被剿窮蹙欲由三汶河竄往沿江一帶國樑馳赴東陽會剿賊由上游馬橋口繞至橋頭又分股竄至英隆湖屯踞我軍疊次邀擊國樑攻抵倉頭賊壘轟斃守城多賊立破前壘二座焚數百賊賊夜遁復帶兵會剿炭渚橋

頭一帶竄匪焚燬炭渚賊踞村落五處賊復糾衆至下蜀街對山築壘分股直撲我營國樑密派兵勇夜襲顧家壩賊營自統官軍分路進攻下蜀街對山各壘節次踏平三月賊陷江浦旋踞浦口圍攻六合國樑馳抵六合之龍池地方適賊由毛許墩焚掠而來國樑統兵截擊陣斬黃衣賊多人賊逸拔營尾追直逼浦口賊於葛塘集築壘二座礮臺五座抵死抗拒國樑馬步兵勇同時並到分路進攻遂復浦口奏入諭曰張國樑渡江協剿疊獲大勝此次迅速復浦口實屬可嘉著賞加提督銜旋移師進剿江浦踞匪逆衆由南門衝出我軍乘勢掩殺並復江浦五月賊撲京峴山大營國樑馳至上墟遇賊接仗斬馘甚多尋帶兵由丹徒鎮一帶夾剿賊大敗復乘夜襲賊營直抵城壕拋擲火罐噴筒賊勢不支越牆竄出我軍四面截殺立燬丁卯橋賊壘寶塔山之賊亦焚壘而遁六月賊窺伺丹陽縣國樑擊走之尋賊於丹陽城外東南隅築壘屯踞國樑進攻石橋衝撲賊營賊大潰進攻和定橋偵知賊於鳳凰岡添築營壘以大礮隔河轟之磨軍三面圍攻賊棄壘遁復派隊鈔剿親督大軍追殺連戰三晝夜斃賊數千賊大恐七月命在向榮軍營幫辦軍務時鎮江之賊分股竄至五里牌黃莊橋等處偷築營壘國樑由五里牌

上流徑渡擊散沿河之賊直薄賊卡礮臺遂督將弁首先衝進燬賊礮臺乘勢進
攻賊伏牆內密開槍礮國樑越過賊壕拋擲火器焚柵破壘斃賊無算旋增兵進
攻河西賊壘就近築營置礮對河轟擊賊棄壘遁進撲五里牌國樑派兵分路攻
擊賊復窺我軍城西營盤並擊走之會向榮卒於軍提督和春以欽差大臣代統
其衆國樑以新易大帥軍威宜振移營進偪賊壘晝夜轟擊賊不能支宵遁我軍
乘夜攻剿悉毀河東西賊壘十餘處賊旋由丹陽竄金壇縣國樑馳赴金壇渡
河進攻賊千餘突撲我新營並分股鈔襲我河西舊營國樑指揮各軍奮勇直前
斃賊尤衆賊圍金壇縣城國樑分三路攻擊親督各軍居中策應毀城南賊營一
座城東礮臺二座其由北門來援之賊擒斬殆盡八月金壇解圍乃進偪黃茅莊
賊壘國樑橫衝賊隊賊首尾不能顧遂潰我軍直擣枝堯里賊巢賊分三路抗拒
我軍國樑派隊迎剿並飭精銳直衝東門外茶亭橋賊由南北二門分出包鈔國
樑鏖戰逾時大敗之遂移營進偪句容縣時句容溧水二城賊踞已久與江寧之
賊勢成掎角我軍紮營張家莊賊添築東南城營盤死守九月國樑分路進攻直
薄東門十月復率馬步隊移營前進賊益困七年二月賊由南土梁來援擊退之

三月督諸軍分路攻城於西門外誘賊出巢痛殲之四月賊從西北兩門擁出千餘來撲國樑領步隊從左攔截賊大敗閏五月擢湖南提督飭各軍夜越城壕直抵城根豎立雲梯賊開礮轟擊我軍突烟而上國樑麾大隊衝殺入城賊屍山積遂復句容奏入賞穿黃馬褂六月移營規復鎮江府以諸軍三面合圍賊援皆絕我軍進紮紅花山賊乘我營壘未成傾巢出撲復以大股突撲我新營國樑督軍擊退之八月金陵賊圖攻高資國樑分路迎擊設伏佯退誘賊至炭渚槍礮齊施賊大敗九月賊疊次出撲國樑偵知賊將西竄先於高資添營扼守賊果於運河之北潛築營壘國樑撥兵痛剿親督各軍由陸路進攻力戰六晝夜斬馘千餘復以水師乘風轟擊賊勢大蹙時金陵之賊以鎮江被圍率悍黨來援自石埠橋至高資連營二十餘里並句結江北捻匪麇聚江濱冀圖竄併國樑督率諸軍悉擊退高資以上直至龍潭迤西援賊十月連奪下蜀街賊營七座陣斬首逆洪秀全之姪僞安王洪仁等賊旋集大股來援十一月我軍進抵龍潭將金陵四次援賊擊殺淨盡國樑知鎮江賊糧絕援斷必將傾巢而出急督隊分攻各門遂克復鎮江府捷聞諭曰張國樑秉性忠正謀勇超羣與和春同心合力共奏膚功著加恩

賞給騎都尉世職尋會剿金山紫墟等處賊匪並進攻秣陵關賊營賊敗竄國樑督隊馳赴高橋門相機進攻十二月攻朝陽門外三洞賊壘奪金陵東北賊營賊復糾皖北捻匪數萬分路滋擾潛襲我軍營盤意欲分我兵力八年正月北門神策門突出悍賊數股並於下關乘駛划船分犯我水陸各營國樑親督大隊迎擊賊屢敗其東北各門並七橋甕之賊亦派兵擊退我軍移營節節進逼值內外賊巢同時火發乘勢盡力剿擊遂復秣陵關其逃竄之賊復經伏兵截殺殲滅無遺前後計殺賊五千餘人斬級數百焚斃者無算捷入賞換雙眼花翎三月進圍金陵國樑設伏誘賊各軍從閒道直薄賊巢且戰且進抵南門賊出大敗之雨花臺印子山復出賊五六千來撲我軍四面兜殺賊屍枕藉時金陵賊陸路接濟已斷自四月至五月百計潰圍國樑與各營會合堵剿直抵雨花臺賊壘殺賊四千餘斬級五百餘賊固守不戰乃議築長圍以困之七月長圍成賊大股出撲國樑令南北各營分攻太平金川二門以艇師襲七里洲尋太平門竄出之賊被殲甚多金川門賊營亦經我軍左右環攻賊大潰我軍復分兩路會擣雨花臺國樑親督策應士氣百倍踴躍登牆將守卡賊悉數殲斃隨舉火爲號伏兵四起殺賊千餘

九月揚州踞賊屢由西北山焚掠圖犯邵伯埭國樑渡江赴援夜令各營挑選勇隊進攻東門賊擁衆出撲大敗之復有騎馬悍賊由北門擁出國樑迎擊槍礮連環繼進賊紛紛落馬轟斃黃衣賊首數人賊隊驚亂國樑揮馬步各軍擁入遂復揚州尋卽拔營前進馳抵儀徵縣之茅家橋賊驚懼東北二門賊壘並撤入城國樑急麾軍由東北直入大隊繼之賊見我軍旗幟不戰而逸遂復儀徵捷入諭曰張國樑援剿江北所向克復實屬奮勇可嘉著卽乘勝將六合等處一律埽除迅速奏功載膺懋賞尋調江南提督會皖北援賊竄陷溧水縣分踞紅藍埠國樑派兵分路進剿遂復溧水尋銅井慈湖之賊四五千並合另股賊五六千衝突我高臺山三山營盤國樑以數十騎陷陣橫衝賊隊連刺黃衣賊數名賊陣潰亂沿途追剿直抵江寧賊巢陣斬僞國宗洪姓一人斃賊無算奏入諭曰江南提督張國樑帶兵剿賊以來時閱數載勤勞懋著上年揚州儀徵失陷該提督渡江援剿於兩旬之間先後收復旋即回軍攻克溧水實屬調度有方著加恩賞給三等輕車都尉世職時江浦浦口兩城亦先後收復皖北各路悍賊及黃池灣汴潰賊同時下竄不下七八萬人分踞烏衣鎮汶口河等處意在攻奪兩城以援金陵九年二

月國樑迎剿賊於黃山賊撲我浦口營盤國樑分軍三路長驅而進衝斷賊隊並擊退九洲洲鈔襲之賊乘勝直抵浦口鏖戰五時之久殺賊二千餘生擒僞因天福洪方僞立天豫莫興等二十餘賊分股撲江浦並橫截浦口大道我軍四面環攻斃賊甚多賊復於江浦縣之雙陽圍蕭家圍築堅壘二座木卡一重國樑督軍五路齊發徑撲賊壘賊出巢抗拒我軍力戰賊勢稍卻忽由包公廟九洲洲各出賊萬餘蠡擁而來我軍分投迎剿毀其帳房木柵攀壘畢登立將賊壘木卡攻破殺賊千餘斬級三百餘旋賊於附近浦口地方潛築營卡國樑督隊首先渡河轟斃踞厓悍賊數十人旋越外濠斬關直入轟塌礮臺一座毀賊壘二座賊卡二道九里山之賊復在蕭家圩旁潛築壘卡我軍環攻山梁悍賊擁衆下壓我軍從烟燄中直踏賊壘奮力先登毀賊營一座殺賊四五百人三月國樑督大隊擣賊中堅擊敗九洲洲悍賊賊又於浦口之西築壘國樑奪其要隘賊壘一律踏平十月皖北賊糾集死黨屢撲浦口大營提督周天培帶兵迎擊國樑撥兵援應以賊勢過重周天培力竭陣亡營盤失陷國樑坐未能先事豫防下部議處十一月浦口踞賊於江浦城西結巢抗拒國樑直趨賊壘賊擁衆數千扼險抵禦國樑以兵兩

路合攻殺賊數百賊回巢死守我軍復分投進剿賊糾浦口老賊四五千伏濠扼卡復以馬步隊密遏要衝鏖戰兩時賊屍枕藉國樑麾兵衝入賊壘礮石雨注未能得手越日乘夜縋城擲放噴筒火箭立將賊壘踏平時賊以我軍前在浦口失利遂東伺揚儀西偪江浦南窺溧水凶燄復熾國樑復渡江督剿毀北山賊卡賊於江邊磨盤洲地方增築營壘我軍四面環攻賊大挫並破北門外賊營陳家集等處之賊竄回天長揚州池西一律肅清乘勝擊退求雨山等處撲竄之賊毀西北賊壘二十餘座十年正月國樑夜飭各軍水陸並進直薄浦口沿隄賊壘賊於牆內開槍抵拒九洲洲又出悍賊數股三面來撲我軍分投迎擊無不辟易國樑復以水陸各軍會攻九洲洲老巢連夜直越重壕斃賊極多遂克復九洲洲賊洵懼壽德州及七里洲賊目咸請獻壘投誠二月國樑會合各軍約期大舉分攻上下兩關賊營投誠賊目暗爲內應從中掩殺遂獲大勝攻克賊營六座平毀賊巢壘卡十餘座撫定脅從五千餘人賊尋由瓜子山突出數千人分撲我軍國樑督隊從中路殺入賊勢不支奪路奔潰斬馘不可勝計閏三月以浙江告警分師赴援金陵之賊知我軍兵單乘閒陷句容縣與城賊遙相聯絡並擾溧水溧陽及東

壩金陵大營後路被賊包鈔國樑遂偕和春退扼丹陽縣國樑復由丹陽上扼鎮江奏入拔去花翎革職留任嗣因丹陽告警國樑由鎮江馳援方與賊遇於丹陽城外兵忽潰國樑策騎渡河水深馬沒沈溺不起事聞命江蘇巡撫薛煥飭國樑之弟張國材迅速尋查具奏八月諭曰江南提督張國樑由廣西自率所部隨同向榮轉戰數省所向無敵朕見其謀勇兼優功勳卓著由偏裨擢至提督並令幫辦軍務殊恩異寵屢賜褒嘉因其克復城池賞給世職該提督感激圖報誓志滅賊數載以來東南半壁倚爲長城惟張國樑之力居多詎意本年夏間金陵大營潰敗和春退守丹陽張國樑自鎮江往援出城擊賊身受重傷策騎渡河人馬俱歿於水先後據薛煥等奏報朕猶以爲傳聞之訛未卽開缺諭令詳細確查並令其弟尋覓骸骨尙冀該提督不死出爲國家宣勞乃距今數月終無確報其爲業經捐軀已無疑義若使張國樑尙在蘇常一帶何至糜爛若此追念盡臣益深愴惻張國樑著追贈太子太保銜照提督陣亡例從優議卹所有任內一切處分悉予開復入祀昭忠祠並著於死事地方及該提督原籍建立專祠以慰忠魂該員子弟幾人著廣東督撫查明俟服闋後送部引見候朕施恩用示朕眷念勳勞優

加褒卹之至意尋賜卹如例予諡忠武賞騎都尉兼一雲騎尉世職襲次完時以恩騎尉世襲罔替同治元年穆宗毅皇帝御極追念死事諸臣戰功卓著者各賜祭一壇國樑與焉並命原籍督撫委道府大員前往該員家祠致祭三年金陵克復加恩賞給三等輕車都尉世職照例將前後三次世職併爲一等男爵兼一雲騎尉五年御史朱鎮奏請於江寧省城建立忠義祠國樑與祀允之十三年兩江總督李宗義奏請於江寧省城合建向榮張國樑專祠詔如所請子廕清襲世爵

鄧紹良

鄧紹良湖南乾州廳人由屯兵洊拔鳳凰廳把總道光二十一年英人滋擾廣東紹良奉調隨營出力賞六品藍翎二十二年隨征崇陽縣逆匪身被數創擢鳳凰廳千總二十四年署永綏廳花園屯守備二十七年實授時新寧逆匪李沅發由廣西回竄據新寧縣之爛泥坳牛坪紹良率五百人追賊至深冲洞敗之擒逆黨李承芬賊屢敗屢竄逼至金峰嶺紹良乘晦銜枚登山譟而馳賊驚潰蹂踐死者無算獲李沅發檻送京師敘功賞揚勇巴圖魯名號並賞換花翎擢提標前營都司二十九年粵賊洪秀全起金田勢張甚提督向榮檄紹良助剿連敗賊於索潭

陶邱墟賊竄潯州駐大黃江紹良麾兵渡對賊壘而軍賊數萬自牛排嶺來會紹良橫衝其陣兩路賊皆大敗咸豐元年追賊至象州之謝官村賊巢環山左右紹良率壯騎奮而上鏖戰箐谷中奪其隘破走之乘勝追至永安州斬其渠賊陣亂大敗之敘功以遊擊陞用尋授武岡營遊擊二年三月超擢雲南楚雄協副將時賊犯桂林圍甚急紹良率楚兵應援一日夜馳三百里屯西門賊百道仰攻紹良連放大礮擊卻之廣西巡撫鄒鳴鶴上其功下部優敘五月賊竄湖南道州寧遠土匪應之連陷江華永明嘉禾桂陽據郴州紹良追及與諸軍合擊相持月餘賊乃遁七月賊撲長沙紹良由安仁赴援八月賊攻城急湖南巡撫張亮基檄紹良入城守禦九月魁星樓側地雷發城圯四丈餘賊蠡擁緣陴上紹良攘臂大呼躍出缺口礮中右膊屹不動麾兵搏戰移時殪先登悍賊百餘賊氣奪督兵累土城復完十月御史陳慶鏞以紹良保湖南省城功甚偉奏請重加拔擢十一月賊由湖南竄湖北陷岳州直趨武昌漢陽巴陵土匪晏仲武復句通粵匪沿途劫掠紹良偕總兵阿勒經阿剌平之二年正月陞安徽壽春鎮總兵二月賊由武昌東下安慶江寧相繼失守連陷鎮江揚州上命紹良赴欽差大臣提督向榮軍營聽候

調遣侍講學士宋晉在籍尙書陳孚恩等交章疏薦紹良旋擢江南提督三月擊退觀音山踞賊五月合攻瓜洲賊突出撲營卻之六月鎮江踞賊出城撲營拋擲火箭各營火起官兵不能禦紹良遂退守丹陽向榮奏請褫紹良職命按律定擬罪名仍交向榮軍營責令帶罪自效七月向榮以屢攻金陵未克檄紹良從外郭之鳳臺門西善橋直趨江東橋掩旗息鼓而進期夜攻旱西門會天已曉賊覺復乘大霧攻朝陽門遊擊朱占鼇殞於陣始退軍十一月賊竄高淳逼東壩向榮檄紹良追擊之十二月仍調赴金陵擊賊屢有功四年四月賊竄太平府窺伺東壩紹良兼程進賊聞風遁紹良遂回攻金陵神策門閏七月攻克太平府紹良移駐其地九月采石沿江以下賊黨肆掠紹良由慈湖銅津直取江寧鎮進攻板橋善橋等處之賊累戰皆捷向榮以紹良馳援東壩轉戰太平攻奪采石無不身先士卒出奇制勝奏請免罪仍令帶兵剿賊旨如所請十二月賊由蕪湖犯徽寧紹良由寧國出屯黃池深壕固壘遏蕪湖內犯之路逆首石幘宗糾各路賊萬餘來撲紹良以賊衆我寡密令各營鎮靜以待豫於山溝土坎埋伏槍礮高阜處多設旗幟以作疑兵賊至兵勇佯退誘至伏所麾兵從樹林中出槍礮並發賊潰走乘勝

追殺二十餘里五年正月蕪湖之賊復乘夜犯黃池紹良用大礮排槍環列營壘
閒賊將近火器齊發擊中執黃旗賊渠墜馬陣斬悍賊數十伏兵分路兜剿殲賊
無算捷聞上以紹良力遏賊鋒保全甚大賞三品頂戴並賞還花翎時賊敗歸蕪
湖復聚金柱關及西梁山圖襲寧國紹良率千總楊萬清赴剿二月賊竄徽州擾
黟縣三月陷婺源源迫近浙江紹良奉命赴援各路援兵均歸調遣至則選精兵伏
要隘獨以數騎嘗敵賊易其少薄之佯北伏發賊敗走以次復婺源石埭蕪湖
諸縣捷入賞還提督銜六月蕪湖賊船麇聚紹良以南陵黃池均緊要乃由灣沚
進兵紮營施家渡復移營老鴉山安慶賊萬餘糾合蕪湖賊由十里亭進撲紹良
連挫其鋒我軍分三路並進一由蕪山進攻北門一由清河水直取東南兩路紹
良由老鴉山進攻內河南岸賊營毀賊卡一焚賊船四十五復蕪湖八月蕪湖上
下游援賊麇至築壘於廣福磯弋磯兩處牽掣我軍紹良力擊之九月授陝西提
督十二月賊據神山後村紹良擊破之六年正月擊退石壘援賊復破范梁山賊
壘三月金陵賊匪外竄上以紹良不能力圖截擊下部議處並褫花翎旋命赴揚
州欽差大臣德興阿軍營幫辦軍務時揚州敗賊方聚擾藥王廟紹良冒雨渡江

赴援敗之於七里橋燬其壘環攻六晝夜復揚州府城四月復敗賊於三汊河尋命幫辦皖南軍務會賊陷寧國府紹良倍道往援先守金河橋拒賊旁竄大敗賊於東溪橋賊疊次出城均擊卻之七月賊竄涇縣紹良偕副將周天受攻剿疊勝九月調浙江提督十月大股賊自柿木鋪援寧國紹良敗之於楊柳鋪進剿夏家渡適援賊圖竄入城與周天受援兵相值殲賊千餘紹良乘勢縱擊賊大潰是役也賊衆號數萬紹良七戰皆捷得旨嘉獎十一月督諸軍奪夏家渡賊壘六焚團山賊壘二乘夜進攻七里岡賊遁追殺至雙桿埠而還寧國賊來援復督諸軍先剿桃花源一帶連奪團山妙葛山等處賊卡自妙葛山分兵六隊環攻十二月城中內應舉火相援沿城棚卡均燒燬各將弁奪門入復寧國府捷聞賞還花翎七年丁母憂命毋庸開缺作爲署任仍留皖南辦理防剿八年二月賊竄黃池紹良駐軍南陵不及援降三級調用旋以收復黃池開復十月黃池敗賊從高村橋小蓀山五里亭三路來犯紹良督諸軍進剿十一月灣沚河東賊勢猖獗我軍渡河修築新營賊以馬隊衝突經總兵戴文英擊回黃池北岸之賊忽竄上土山瞰我軍營壘空虛處以馬步萬餘躡水渡河復從黃池山後分股斷紹良接應以大股

合圍灣沚營戴文英歿於陣賊愈熾紹良舉火自燔其營率親兵血戰歿於陣事聞諭曰浙江提督鄧紹良由湖南備弁帶兵剿賊洊歷專閩桂林長沙力保危城厥功甚偉前由江南大營分兵赴徽浙督剿五載以來疊復郡縣茲據奏於灣沚地方與賊接仗力竭陣亡深堪憫惜鄧紹良著加恩照提督例賜卹一切處分悉予開復應得卹典該衙門察例具奏並於殉難地方建立專祠以慰忠魂尋賜卹如例贈太子少保銜予諡忠武賞騎都尉兼一雲騎尉世職襲次完時以恩騎尉世襲罔替九年二月諭曰鄧紹良戰功卓著臨危授命業經降旨賜卹伊子光祿寺署正銜鄧亨先著俟服闋後交部帶領引見候朕施恩鄧紹良之父鄧士儼原任湖南平江縣訓導年逾八旬並著加恩賞銀四百兩由湖南藩庫給領用示朕優卹蓋臣至意七月江寧將軍和春奏亨先尋父屍不獲上憫之賞亨先員外郎銜十二月湖南巡撫駱秉章奏請將紹良等於湖南省城建表忠祠彙祀允之同治元年穆宗毅皇帝御極追念死事諸臣功勛卓著者各賜祭一壇紹良與焉子亨先員外郎銜襲世職

塔齊布

塔齊布陶佳氏滿洲鑲黃旗人由護軍洊授藍翎侍衛陞三等侍衛咸豐元年揀發湖南以都司用二年七月廣西會匪洪秀全等竄湖南犯長沙省城塔齊布隨提督鮑起豹等嬰城固守十月偕各路援兵內外夾擊賊遁城圍遂解三年正月欽差大臣徐廣縉等以塔齊布守城出力保奏得旨以遊擊陞用賞戴藍翎尋署撫標中軍參將六月在籍前任禮部右侍郎曾國藩奏稱塔齊布短衣草履日督麾下士卒演鴛鴦連環陣對放槍礮數伏數起俾臨敵無畏心悉成勁旅觀其奮往耐勞深得兵心洵忠勇可大用疏入賞副將銜七月署湖廣總督張亮基復保奏塔齊布膽識俱壯訓練認真得旨以副將陞用十月江西太和縣土匪竄擾湖南茶陵州安仁縣塔齊布以署巡撫駱秉章檄剿平之賞換花翎記名以副將用四年三月粵匪自金陵溯江而上越安慶武昌再陷湖南岳州府過洞庭以戈船徧布臨資口遂由湘陰破寧鄉間道襲湘潭縣湘潭居長沙上游百貨所輳旣得湘潭長沙將不攻自困塔齊布聞警卽率守備周鳳山等兼程前進由陸路轉戰而前師次高嶺賊奄至塔齊布手大旗麾軍縱擊斬僞先鋒元帥九人賊敗潰追奔數里至城下賊大出犯塔齊布伏兵山左右設礮三重誘之及賊逼礮斃賊數

百賊大亂伏起夾擊之賊奪路走死傷枕藉遂薄城圍殪悍賊數百塔齊布橫矛深入幾中伏跳而免麾兵鏖戰大破之城北賊柵皆盡總兵楊岳斌知府彭玉麟褚汝航復率水師會剿焚城南賊舟數千並焚市廛使城外賊無所棲止火光燭天三日夜賊屍蔽江下四月賊棄城夜遁湘潭平捷聞賞總兵銜並略屯巴圖魯名號值鮑起豹奪職命塔齊布署湖南提督六月實授時湖北武昌漢陽再陷其分踞岳州之賊復陷常德澧州塔齊布由陸路馳抵新牆破賊土城三水師亦破賊雷公湖又敗之於道林磯塔齊布與知府羅澤南李續賓合攻岳州敗賊於高橋閨七月盡破賊壘賊棄城遁遂克岳州賊尋於城陵磯以下洋陵磯以上及羅山對岸之夾洲灣伏船千餘並匿悍賊於岸誘我軍深入褚汝航等率水師直逼城陵磯賊方登舟發伏適塔齊布亦豫於陸路設伏突起截擊大敗之嗣水師失利賊由城陵磯登岸分三路撲營塔齊布亦分三路迎擊賊潰敗追至擂鼓巷突有賊酋戟髯深目躍而前槊及塔齊布所乘馬親兵黃明魁躍起以矛刺酋墜馬殪之獲賊旗視所署字知爲僞丞相曾添養添養驍捷桀黠屢出奇敗我軍羣賊倚之至是殲焉賊皆奪氣中路潰其左右路猶拒戰我兵奮擊復大敗之是役也

燬賊壘二十餘殺賊二萬餘自倒口抵六谿口賊船殆盡捷聞諭曰岳州克復以後逆賊雖疊被懲創尙踞沿江營壘以阻我軍東下其城陵磯等處營壘繇互二百餘里經官兵於數日之間悉數蹋平辦理甚合機宜塔齊布著交部從優議敘八月塔齊布自臨湘進剿長安驛羊樓崗佛嶺大沙坪等處戰屢捷時崇陽之賊踞城守隘阻我軍東下之路其地連峰轟天蹊徑峻險塔齊布偕羅澤南分道進梯緣絕壁而上克三壘奪其隘直逼城下攻東北門潛以礮轟西門克之並復蒲圻咸寧等縣又敗賊於官步橋及徐李埔遂與澤南進屯江夏之紫坊時曾國藩方與諸將議攻武昌定議羅澤南攻花園賊壘水師扼長江塔齊布由油房嶺趨扼武昌之洪山時賊艘屯鹽關並築壘於東西岸爲武昌掎角塔齊布等軍三路齊下賊不支鹽關東西岸賊船營壘悉燬武昌之賊震懼開東北門遁餘賊猶抗守西南城我兵以礮轟望山門由僻處躡城上舉火爲號各營乘勢擁入俘賊渠陳昌貴等餘賊遁趨洪山塔齊布豫設伏山下躬自迎擊戮其渠賊繞山走伏發逼陷沙湖湖淺尸填溢後奔者踐而行至中流悉漂沒遂復武昌省城水師亦同日攻克漢陽府武昌旣復進攻大冶轉戰至五里牌塔齊布怒馬入陣殲賊酋兵

勇繼進燬其外壘賊反鬪伏突起刺傷塔齊布坐馬左右兩軍合擊賊復大潰直抵城下克北門追奔至南關賊爭橋渡橋斷賊多墜水死俘百四十餘人會羅澤南亦克復興國州於是兩軍會於興國籌進取澤南西擣半壁山塔齊布東剿富池口十月與賊戰於軍山觜克之遂駐軍其地距羅軍十餘里中隔小河塔齊布等方造浮橋濟忽出賊數千遏渡處別賊數千陣半壁山左右與澤南拒戰塔齊布隔河爲聲援賊大敗旋賊由富池口沿岸而上冀襲我軍後塔齊布擊走之會浮橋成田家鎮之賊渡江來奪塔齊布與澤南夾擊戮其渠殲賊六七百人時賊所設橫江鐵鎖在南岸者已斷而北岸猶未破彭玉麟等以水師剿北岸之賊塔齊布與澤南列陣半壁山助之燔賊舟數千北岸鐵鎖悉銷燬賊遁竄廣濟黃梅遂克田家鎮捷入賞穿黃馬褂並騎都尉世職復諭曰塔齊布自岳州統師東下所向克捷皆因同心戮力調度有方朕心實深欣慰在事文武員弁亦能人人用命奮不顧身尤堪嘉獎尋偕羅澤南渡江繞至蘄州及賊於蓮花橋遇伏我前隊少卻塔齊布匹馬突陣手刃大旗賊追奔五十里遂復廣濟縣而黃梅爲賊必爭地悍酋秦日綱陳玉成羅大綱併力守之以數萬賊分布小池口孔壠驛立堅壘

五於大河埔龍頭寨等處十一月我軍次雙城驛未成列賊出二萬餘分三路掩襲塔齊布等堅持不動少頃亦分三隊突起憑高下擊賊左右路潰其中路猶負谿抗拒我兵奮躍戮其渠數人餘賊披靡回奔大河埔糾援賊返鬪塔齊布等揮兵疾進殲賊三千餘俘九十餘遂進軍黃梅城攻北門我兵肉薄而登多受創塔齊布頭被石擊流血被面督戰益力遂克黃梅縣尋安徽之賊來援糾敗賊踞孔壠驛小池口我軍敗之於濯港直逼孔壠驛賊於驛西南北三面築土城塔齊布從西南路進攻累肩爲梯卓矛而躍遂大破之賊悉竄小池口分黨奔湖口與九江之賊相掎角爲死守計時曾國藩駐軍九江城外塔齊布遂與羅澤南渡江會攻九江彭玉麟等率師直下湖口燬賊舟六十餘並輜重大船三捷聞諭曰見在大軍扼守湖口要隘九江逆匪首尾不能相顧可期即日掃除曾國藩塔齊布運籌決勝戮力同心麾下將士率皆轉戰直前爭先用命著賞白玉四喜搬指一箇白玉巴圖魯翎管一枝玉柄小刀一把火鏟一把交塔齊布祇領以示優獎十二月攻九江西南門不拔會水師被賊襲喪失輜重羅澤南自二套口渡江進攻小池口塔齊布率壯士二十人渡江督戰以衆寡不敵敗且戰且退塔齊布匹馬衝

突爲諸軍捍蔽有黃衣賊酋三人策馬來犯塔齊布以套馬竿圈一酋頸斬之且奪其馬餘賊皆靡塔齊布俟大隊沿江上始單騎渡江回營時已除夕三鼓矣五年正月城賊出犯塔齊布擊斃賊二百餘生擒二十餘復令暗伏地雷誘賊來撲陷之果斃賊百餘其後戰屢捷而城終不下會湖北之賊復由興國州上竄湖廣總督楊霽不能禦三月連陷湖北郡縣武昌再陷賊勢復熾塔齊布分兵赴援仍親督軍九江城下百計仰攻賊拒守甚力六月曾國藩與塔齊布會於青山曾國藩議移師東渡剿湖口及東流建德長驅直下塔齊布以攻具方備誓力破此城七月方傳令攻城忽患氣脫卒於軍事聞諭曰湖南提督塔齊布由侍衛揀發都司洊陞副將在湖南剿賊疊著戰功朕知其忠勇奮發由副將超授提督上年克復武漢追賊九江身經百戰所向無前疊經賞戴花翎並賞給喀屯巴圖魯名號騎都尉世職賞穿黃馬褂該提督年力正壯方冀迅克潯郡淨殄妖氛茲陡患心悸甫經半日在營病故悼惜殊深著照將軍軍營病故例賜卹准其入城治喪應得卹典該衙門察例具奏並著該旗查明該提督子嗣百日後帶領引見候朕施恩八月前任禮部侍郎曾國藩奏塔齊布肫誠報國忠勇絕倫自爲都司時毅然

有殺賊立功之志上年超擢提督出師岳州途次於左臂涅刺忠心報國四字每戰匹馬當先或他營被圍輒躍馬馳往救援凡相度戰地及察看賊營情形每以單騎清晨獨往屢瀕危險常有奇緣得免於難賊中驚以爲神其爲人從容謙退未嘗自伐其能且紀律嚴明居心仁厚身歿之後軍士百姓同聲悲泣不獨臣軍失此名將卽東南衆望亦倚爲長城遠近官軍同深驚悼上年湘潭岳州之戰保全省城厥功甚偉請於湖南省城建立專祀允之尋賜卹如例予諡忠武賞騎都尉世職襲次完時以恩騎尉世襲罔替九年入祀湖南表忠祠同治元年穆宗毅皇帝御極追念死事諸臣各賜祭一壇塔齊布與焉三年金陵克復上加恩賞三等輕車都尉入祀昭忠祠塔齊布無子弟阿林布襲世職

雙福

雙福他塔拉氏滿洲正白旗人由護軍於道光八年擢護軍校十年隨赴喀什噶爾剿安集延布魯特回匪十八年洊陞副護軍參領十九年上校閱兩翼營弁射雙福中箭五枝陞護軍參領二十一年二月揀發湖北以副將用三月署黃州協副將八月署湖廣督標左右二營遊擊十二月崇陽縣匪首鍾人杰作亂雙福以

湖廣總督裕泰檄駐蒲圻縣丁泗橋堵剿除夕賊二千餘犯守備王榮把總陳錦營雙福督隊救應殲賊數十馘六級俘賊渠王得茂餘匪遁二十二年正月諜知賊由崇陽乘夜來犯豫爲布置以連環槍礮四面轟擊斃賊七十餘黎明餘匪潰另股數百人將由嚴家山冰嶺犯通山縣北境雙福截擊殲賊數十餘悉解散嗣賊乘小舟數十犯蒲圻縣並分踞東南山坡官兵轟斃數百人賊猶恃衆負嵎勢甚猖獗雙福率兵勇沿河奮擊燬其舟斃賊二千餘墮水者百餘俘獲多名裕泰疊次奏入上嘉之賞戴花翎並遇缺卽補尋事平敘功復賞烏爾瑪斯巴圖魯名號五月署督標中軍副將十月補湖北施南協副將二十六年丁母憂回旗仍署護軍參領二十七年丁父憂二十九年服闋授江南漕標中軍副將三十年十一月調湖廣督標中軍副將尋陞河南河北鎮總兵十二月調貴州古州鎮總兵咸豐二年二月署湖北提督以貴州方防堵粵匪未卽抵任七月陞江南提督仍命署湖北提督十一月實授時粵匪洪秀全等由湖南下竄犯湖北武昌省城雙福偕巡撫常大淳等嬰城固守十二月賊於城西平湖文昌各門由江岸穴地道轟地雷而進東面赴援諸軍聲勢隔絕城遂陷雙福率兵勇巷戰力竭死之其長子

已革前鋒校德齡亦遇害三年克復武昌署巡撫駱秉章遵旨查明奏聞諭曰此次逆賊攻陷武昌闔城文武官員堅守二十餘日竟以力竭同時殉難朕每一念及悲憫淚零湖北提督雙福著加一等賜卹該員嬰城固守臨難捐軀大節凜然允足垂型不朽著於該地方建立專祠以慰忠魂又命此次殉難道員以上之子孫服闋後俱帶領引見尋賜卹如例予諡武烈賞騎都尉兼一雲騎尉世職襲次完時以恩騎尉世襲罔替子德隆德森俱賞員外郎德齡亦蒙恩照陣亡例議卹賞恩騎尉世職德齡之子瑞祥襲騎都尉世職並襲恩騎尉

尤渤

尤渤甘肅武威人由行伍於嘉慶十二年隨涼州鎮總兵吳廷剛赴西寧口外征剿番賊有功歷拔提標左營千總尋調大馬營千總道光六年逆回張格爾作亂陷喀什噶爾等四城渤隨甘肅提督齊慎出師戰於阿克蘇南路柯爾坪生擒賊二殲四人七年二月駐兵烏什卡外偵知奇里克部落布魯特潛謀附逆卽入山搜捕三月抵怎當山殺賊二百餘俘十餘名尋進逼賊巢至佳噶賴分步隊兩路入林莽中伏起渤右骹受石傷奮勇冒突手刃三賊我兵合圍搜戮殆盡以功陞

南古城堡守備六月西四城克復張逆遁渤由烏什調赴喀什噶爾大營出哈蘭
圭卡外追捕十二月張逆就擒八年正月渤奉檄押解回營賞戴藍翎十二月以
承修喀什噶爾城垣出力得旨以應陞之缺陞用十年陞陝西西安鎮標右營都
司十二年陞鞏昌營遊擊十八年五月調長安營遊擊九月陞河南汝寧營參將
尋調撫標中營參將二十一年七月陞荆子關協副將八月擢安徽壽春鎮總兵
二十二年五月英人犯順浙江江蘇各海口戒嚴渤以兩江總督牛鑑檄帶兵赴
上海應援嗣因蘇省捍衛緊要復由嘉興馳赴蘇州扼要爲之備時英人攻陷寶
山上海後分艤駛入泖湖並疊犯松江府城渤整隊相持令兵伏地用擡礮火槍
連環轟擊卻之尋以英船北駛渤仍留兵松江防堵六月署江南提督八月實授
九月英人就撫命渤偕兩江總督耆英籌議江蘇善後諸務十二月賞換花翎尋
疏言水師營以講求操駕舟楫辨識風雲沙線熟習大礮鳥槍爲首務不重騎射
請嗣後水師員弁專取水務槍礮卽騎射稍有生疏亦准錄用允行旋陳長江大
略情形疏稱江南常熟之福山與江北通州之狼山對峙中間隔水面八十餘里
福山以上江陰壩之鵝鼻觜爲長江第一重內戶丹徒縣之圖山關爲第二重內

戶圖山關以上江面曲折兩岸平行至焦山則屹立江心南對鎮江府之象山北對江都縣之灘地再上十數里爲京口京口外稍西爲金山正對北岸之瓜洲以上盡係洲地至江寧之燕子磯爲省城門戶均宜擇要設守得旨詳加布置次第舉行二十三年二月偕耆英奏江防事宜略云狼福二山對峙於江海之交崇明爲中流砥柱定制於狼山崇明設立狼山蘇松二鎮總兵福山僅止遊擊輕重懸殊應於福山添設水師總兵一員內可攔截海口翼蔽蘇州外可控制吳淞海口並陳蘇松鎮標各營應與毗連各營互相操巡以資聯絡福山狼山二營應專管福狼一帶江面以專責成京口左右二營應分防鵝鼻觚圖山關等處以免推諉高資營兵應操巡練習以防圖山關三江營守備改爲內河水師以備操防戰船見未造成先製木筏以遏要隘總督按年巡閱圖山關鵝鼻觚江防一次以免疏懈鵝鼻觚圖山關外江心河洲及鎮江揚州江寧省城門戶吳淞口與吳淞上海後路江北後路均豫備兵礮以昭嚴密上海應移駐同知以資彈壓提標右營遊擊應陞爲參將加副將銜以崇體制常熟昭文縣城應移駐弁兵以資防守操練水師以資造就練習泅水兵勇以資實用提標副將應出洋考校以杜偷安陸路

汛守兵丁一體操練以免缺額酌裁外海內河水師營馬匹以資協濟加給水師操巡口糧以資養贍礮位分局鼓鑄以資利用補製遺失器械以免缺誤沿海沿江要隘修復汛地兵房以資戍守慎選將弁以聯兵情調和文武以免猜忌消弭伏莽以固根本奏入下部議行三月以鵝鼻觜圖山關等處爲江面扼要渤偕耆英籌備划船木筏招募泅水壯勇教習營兵耆英授欽差大臣赴廣東命渤偕江蘇巡撫孫善寶署漕運總督李湘棻妥爲辦理五月以前奏請添設福山水師總兵有旨令通盤籌畫以節糜費渤偕署總督璧昌奏言總兵養廉等項在於裁減馬乾項下支銷其應添鎮標三營卽以福山原營作爲福山鎮標中營尙有左右二營查蘇松鎮原設中左右奇四營卽移奇營全數爲福山鎮左營楊舍營陸路都司一缺事務較簡卽改爲福山鎮右營內河水師都司所有額設弁兵均酌量籌撥無庸增添並無設官添兵之費而江海防禦藉資得力如其所請先是靖逆將軍奕山奏呈廣東官紳造成各船圖說命江南福建浙江各督撫就所轄江海情形詳議適浙江提督李廷鈺道過蘇州渤偕耆英知其籍隸福建同安熟悉水務船政向其諮訪據稱所造各船於江蘇內江外洋均不合用惟同安梭船操

縱自如請飭李廷鈺繞道上海先造梭船二隻子船四隻以資試練至是十月梭船造成渤親赴崇明劉河口外配兵試演奏稱梭船喫水較深請交外洋駕駛其崇明營調到闊頭舳板船於江面駕駛靈便請依式接造以備派給並言水師領船到營多不認真巡守舵水兵丁私將篷桅篙纜偷賣甚至賃與鄉民裝運柴草一經飭調操演則諉爲船不堪用亟宜嚴定章程俾將弁不視操巡爲具文而各營船隻亦不致日久廢棄如所請行初璧昌奏請修築鵝鼻背等處礮城上以耆英奏陳沿江礮臺甄石則工費浩繁土築又風雨剝蝕宜節省建築爲造船練兵之用又因御史曹履泰奏請於鵝鼻背設立南北兩坪土壘土堡外開濠溝不用甄石工價甚減諭令璧昌同渤籌議二十四年疏稱因地制宜於江面堅築土墩多多益善外種蘆葦藏伏兵礮歲取蘆柴藉資兵爨根荻日久潛滋土壘益臻堅固並勘明沿江安礮處所報聞二十五年七月以營縣會拏匪犯中途被奪渤坐不能認真整頓營伍下部議處十月大江南北兩岸礮隄工竣渤偕璧昌奏入上訓勉之二十六年又偕璧昌奏言蘇松二郡之澱山湖泖湖入吳淞江與黃浦江合流至此入海故總名爲吳淞口海船如由外洋達江須繞銅河外洋不由吳淞

入口見在英船通商往來在口內停泊東西兩岸均有營汛墩臺安置礮位官兵守護瞭望到口出口俱有稽察頗爲安靜未便稍涉張皇惟溯吳淞江而上有野雞墩爲赴蘇必由之路溯黃浦口而上有閔行墩爲赴淞江必由之路應於二處設兵安礮以固蘇松藩籬上納之時洋面劫案未盡璧昌有辨認船隻之議命璧昌會同渤再行詳議二十七年奏言英船與內地船式本不同盜船與商船行走亦異至人心狡詐或英人獲民船卽乘民船行劫或民盜勾通英船行劫是必嚴飭沿海文武認真巡緝其巢穴在岸者責成地方州縣其蹤跡在洋者責成水師營汛購覓眼線細辨其孰爲商船盜船孰爲真夷假夷總期奸匪無從假託而後已如所議行二十八年四月因病請假七月病痊經總督李星沅奏入諭曰覽奏欣慰江南提督尤渤辦事認真操防得力朕所素知毋庸來京陛見免得徒勞往返尤渤著卽行接印視事旋因山東巡撫徐澤醇奏海洋盜船乘風遊駛見飭實力防堵上命渤迅派水師得力員弁帶兵扼要兜剿二十九年復因病奏請開缺允之咸豐二年卒

陳金綬

陳金綬四川岳池人嘉慶三年由行伍隨剿本省及陝西教匪殲擒首逆王廷詔馬五等六年拔四川提標右營額外外委七年擢夔州協標左營外委九年擢山西河保營把總賞戴藍翎十年調陝西西鄉營把總十一年隨陝西提督楊遇春進剿寧陝叛匪殲獲首逆陳先倫等遷左哨千總十八年隨楊遇春剿河南滑縣教匪由封邱延津追擊首逆李文成克司寨文成自焚死陞甄井堡守備尋回攻滑縣克之逆渠牛亮臣等殲焉尋以陝西三才峽及南山老林匪徒滋事遵檄移師剿平之十九年調整厓營守備賞換花翎道光元年署孝義營都司三年歷署西鳳營守備西鄉營都司四年陞陽平關營都司六年逆回張格爾句結布魯特作亂陷喀什噶爾等四城大兵進剿烏什近接布魯特爲我兵後路金綬隨甘肅提督齊慎等赴烏什防守七年二月偵知山內匿有布魯特匪徒將乘機竊發隨副將李士林等入山搜捕三月抵山口見一賊於東北山頂以其帽手搖傳號百餘匪卽上山踞險以槍石下擊金綬偕守備王一鳳等鈔上山梁殲賊七十餘追殲二十餘俘四名四月巡山至佳噶賴謀知逆匪窩巢不遠分兩路進林莽中伏起金綬首先擊殲數名各軍合力奮剿殲百數十名餘匪潰搜戮殆盡閏五月陞

留壩營遊擊七月以搜烏什匪功經揚威將軍大學士長齡奏入賞逸勇巴圖魯名號十月喀什噶爾等四城以次克復張格爾遁匿阿坦台等處復圖肆擾金綬隨提督達凌阿仍駐烏什防守尋張逆就擒凱撤回任十一年三月署漢中鎮標中軍遊擊五月調西安鎮標中軍遊擊十三年正月直隸總督琦善以直隸各營將領多未經行陣之員奏調陝甘員弁赴直隸補用藉資教練金綬與焉四月署直隸督標前營遊擊十四年補天津鎮標中軍遊擊十五年六月陞福建泉州營參將尋得旨仍留直隸陞用十一月補固關營參將護理正定鎮總兵十六年署保定營參將十八年陞督標中軍副將十九年琦善遵保堪勝陸路總兵之員以金綬操守廉潔曉暢機宜疏薦之硃批係朕所知毋庸送部引見著交軍機處記名以總兵用二十年三月授天津鎮總兵四月入覲時英吉利兵船擾廣東各海口戒嚴金綬偕宣化鎮總兵石生玉遵旨於天津擇要設兵安礮豫備堵剿二十一年海氛稍戢仍留大沽北塘等處防守尋復熾疊奉諭申嚴兵備賜裘一襲二十二年九月英人就撫事平解嚴諭曰天津爲畿輔重地見在地方靜謐巡察周密允宜特沛恩施以旌勞勩金綬賞緞匹下部優敘十月陞直隸提督二十五

年馬蘭鎮餘丁梁永順戕官自戕案發金綬坐失察降一級留任二十八年上謁西陵蹕路未能修治妥速偕總督訥爾經額奏參管道員弁並自請議處上加恩免議二十九年西陵紅椿內官樹被竊坐失察降二級留任三十年三月九月兩次入覲咸豐二年以廣西會匪洪秀全等竄陷湖南岳州府犯湖北武昌漢陽勢甚熾命金綬率直隸官兵三千隨署河南巡撫琦善赴楚豫交界防堵尋幫辦軍務三年正月賊由湖北陷江西九江府勢將蔽江東竄安徽戒嚴上疊次飭金綬隨琦善由信陽州星速赴援二月抵皖安慶府已失守賊連陷江南江寧鎮江揚州三府上責琦善等未能迅速應援金綬亦摘去頂帶帶罪圖功時金綬抵江北浦口鎮偕內閣學士勝保督隊進攻賊出拒我兵奮力前擊克之俘斬多名尋移營帽兒墩琦善兵亦繼至金綬等由西路進與琦善合攻揚州殫賊數千先後捷聞得旨開復頂帶並賞四喜搬指白玉翎管及大荷包等件賊於揚州城外加築土城江寧賊出援之我兵駐寶山司徒廟等處距賊祇三里許併力進攻賊數千蠡擁出自辰至酉五戰五勝燬土城五殲賊七八千奪獲旗械無算上以旬日之間疊獲勝仗優詔嘉獎之四月仍由西路進與各軍合攻轟塌城堞十餘處穿城

身數穴賊隨毀隨補堅匿不出五月總兵雙來以大礮轟塌城垣遂用木棍作浮橋渡河架雲梯而上正鏖戰間金綬策應之兵遷延不用命雙來孤軍無繼受槍傷而退事聞上飭其督率無方復摘去頂帶九月我軍增高礮臺俯城轟擊賊震懾分門縋城衝突圖竄金綬等擊敗之仍賞還頂帶尋城中又突出賊五六千撲營總兵瞿騰龍等分投迎擊金綬督參將鞠殿華由西門接應賊遁追奔直抵城下俘馘甚衆時賊分股踞瓜洲江岸樹立壁壘與儀徵之賊爲犄角十一月賊迭出應援俱被我兵擊退旋以揚州東路參將馮景尼營兵勇潰散各路效尤賊遂由揚州城竄出仍踞瓜洲琦善以克復揚州入奏諭曰琦善統領全軍不能及早克復揚州至鄉勇潰散復以賊從東路竄出藉詞諉罪陳金綬督辦軍務一籌莫展厥罪惟均均著革職帶罪自效四年七月賊由瓜洲糾鎮江之賊由東西岸來犯東岸約三四人分三路麇至我兵亦三路前擊金綬躬自督戰殪賊三百餘賊大潰追奔至四里鋪賊收合餘燼併力回鬪我兵以馬隊橫擊之射其渠金綬督各路繼進自辰至申鏖戰數時殲賊千餘俘馘及溺斃者無算餘賊竄虹橋等處意圖掠食亦追戮殆盡時欽差大臣琦善卒於軍金綬暫署關防九月賞三品

頂帶時提督托明阿以欽差大臣赴江北剿賊偕金綬疊攻瓜洲之賊敗之十一月抵瓜洲城下攻之未克賊於新橋等處築壘爲衛四出焚掠金綬等馳擊力戰三時之久毀其壘殲賊六七百俘賊渠二奪獲火藥米穀甚多金綬之姪八品頂帶陳能義首先陷壘身受重傷偕遊擊海明等歿於陣自十二月至五年正月賊以改歲之交於帶子溝樸樹灣等處八次出撲圖北竄金綬等均擊卻之四月偕托明阿由東西岸進東岸賊千餘蠡擁而出遊擊王建功殲賊數十賊向虹橋四竄我兵分道前追援賊二千繼至副都統德興阿等由後合擊忽雨甚侍衛穆克登額以馬隊援應殲賊多名賊乃退尋築垣空濠逼賊巢圍之自七月至十月疊有斬獲十二月偕托明阿分東西岸剿賊遂以乘夜逼賊出巢殲無算入奏上嚴責其並無殺斃賊數足見過事掩飾六年賊由土橋一帶分股上竄各路兵勇相繼潰揚州復陷諭曰此次雖經德興阿督帶馬隊連日截殺斃賊數千而營盤連失府城復陷托明阿調度無方實堪痛恨陳金綬駐兵東岸當逆匪直撲三汊河營盤並不派兵接應見在退至何處亦未與托明阿會合恇怯無能厥罪甚重托明阿著先行革職陳金綬業經革職所有三品頂帶著先行摘去聽候查辦尋

德興阿收復揚州金綬偕幫辦軍務太常寺卿雷以誠泊船萬福橋德興阿以金綬等並未督兵進攻遽奏由東路督隊助剿疏劾之適金綬已於三月病歿子能徵刑部郎中同治元年在籍守城殉難賞雲騎尉世職孫顯德候選通判顯銘都司亦均在籍殉難顯誠襲其父能徵世職

樂善

樂善伊勒忒氏蒙古正白旗人由拜唐阿於道光二十年補鑾儀衛整儀尉二十四年遷治儀正二十七年陞雲麾使三十年揀發陝甘以參將用咸豐二年八月隨同涼州鎮總兵崇保馳剿鎮羌卡外番賊敗賊於炭礮溝復偕副將雙來攻克黑茨溝斃賊五千奪回牲畜二百餘賊仍踞河北柯柯烏蘇地方九月樂善等冒雪進剿四戰皆捷擒其渠阿里克公住於陣餘賊悉平卡地肅清總督舒興阿以聞三年九月命以參將卽補並賞戴花翎十一月粵匪竄擾近畿樂善隨欽差大臣都統勝保攻賊於獨流敗之賞副將銜四年二月以剿平三村出力賞巴克敦巴圖魯名號八月署西安城守營副將五年以疏防已革遊擊蕙椿畏罪逃逸革職留任六年四月河南捻匪張落刑等竄擾鹿邑縣樂善偕總兵邱聯恩等剿賊

於界溝集大破之生擒匪首張拴等捷聞開復革留處分六月樂善率領馬隊剿擒匪於潁川六十里鋪擒斬多名獲賊車四百餘兩九月偕總管格綳額等渡吳家河馬村橋口賊悉衆來拒樂善等密伏馬隊鈔截敗之七年二月擢河南河北鎮總兵檄藍翎馬甲穆騰額等分軍攻剿方家集賊巢擒擒首錢萬榮等時擒匪竄踞三河尖以柳溝集爲門戶四月樂善進攻督兵過橋場其圍復令馬隊居中施放火箭賊驚潰遂毀柳溝集五月復攻剿方家集乘夜霧直薄逆壘越濠入後隊繼進克之斃匪三千餘賞提督銜九月隨勝保督兵進攻正陽關首先突陣槍斃逆首二名大軍乘之擒衆大潰遂復正陽關擒擒首魏藍等於陣八年移營逼近固始城外逆壘平毀觀音閣一帶匪巢復偕安徽布政使李孟羣等擒斬僞天侯卜占魁等餘匪殄滅殆盡遂解固始圍得旨遇有提督缺出由軍機處題奏並賞穿黃馬褂旋請假回旗葬親允之九年正月假滿命仍赴勝保軍營隨同剿賊尋又命往天津交欽差大臣科爾沁親王僧格林沁差委五月授直隸提督八月英吉利兵船闖入大沽海口僧格林沁督將弁扼截將英船擊退樂善以訓練得人下部優敘十年七月英人攻陷海口樂善力戰死之事聞諭曰直隸提督樂善

久歷戎行戰功疊著茲在海口防所陣亡殊堪憫惻著照提督陣亡例從優議卹所有任內一切處分悉予開復該提督有無子嗣著該旗查明具奏並著在海口地方建立專祠以慰忠魂尋賜卹如例贈太子少保銜予諡威毅入祀京師並天津府城昭忠祠賞騎都尉兼一雲騎尉世職襲次完時以恩騎尉世襲罔替復諭曰樂善之子成友成受俟百日孝滿後由該旗帶領引見十二月得旨成友賞二等男爵世職十一年復賞二等侍衛在大門上行走成受賞驍騎校同治元年穆宗毅皇帝御極追念死事諸臣各賜祭一壇樂善與焉成友二等侍衛兼襲二等男爵成受驍騎校

鞠殿華

鞠殿華山東安邱人道光十五年一甲三名武進士授二等侍衛期滿以遊擊用二十三年補直隸提標前營遊擊咸豐二年五月陞陝西延安營參將七月調補直隸提標中軍參將三年四月廣西會匪竄擾江南欽差大臣琦善前往剿辦殿華奉調隨營時揚州城陷琦善派殿華等分路進攻毀城外賊壘七月至八月兩次敗賊於西門又敗賊於埽垢山十一月賊自儀徵來援殿華偕副都統薩炳阿

擊走之十二月官軍圍攻儀徵縣城殿華等帶兵馳至由東北二門攻入遂將儀徵收復四年二月陞直隸大沽協副將進攻瓜洲時瓜洲踞匪與鎮江賊往來勾結殿華等疊擊敗之敍功賞戴花翎並賞給強都巴圖魯名號九月官兵於運河口以船搭橋直逼瓜洲城壕賊以鐵索貫巨木爲抗拒計殿華令水勇砍斷之十一月我軍越過城壕直至城下五年擢山西大同鎮總兵六年三月隨欽差大臣德興阿收復揚州四月儀徵賊由硯臺山至廟山欲繞襲六合德興阿檄協領富明阿鈔前截擊殿華在後兜剿敗之十一月賊壘陷江浦天長高望等處並有股匪闖入三汊河經殿華擊退七年四月德興阿等會剿瓜洲殿華敗賊於四里鋪尋帶馬步隊進攻搶渡重壕直逼賊壘十一月命在德興阿軍營幫辦軍務是月復圍瓜洲殿華受傷仍裹創力戰克之賞提督銜遇有提督缺出由軍機處題奏尋大軍移攻江浦德興阿由東路進殿華由西路進八年正月攻西門及求雨山賊營均破之收復江浦縣城時皖匪麇聚滁州三月殿華督兵進剿行至八里鋪遇賊躍馬直前擒殺多名六月命開缺以提督候補八月浦口陷殿華以督率無方革職留任九月揚州復陷禡花翎九年五月以遊擊冷震東削矛桿不如式呵

斥之罰跪泥淖中復手批其頰震東負氣回營自縊殿華畏罪自盡七月經欽差大臣提督和春奏言鞠殿華情性暴戾動輒陵辱將士因其打仗勇敢是以留營剿捕乃因矛盾細故毆打屬官任性荒謬自應照例革職治以應得之咎今既畏罪自盡是該兩員死由自取與人無干均無庸議從之

博勒恭武

博勒恭武閩佳氏滿洲正白旗人由烏槍護軍於嘉慶十八年出師河南歷授驍騎校步軍校步軍協尉二十五年揀發浙江以遊擊用道光二年署嘉興協副將四年補提標後營遊擊十一年陞寧海營參將十五年陞杭州協副將十九年擢湖北宜昌鎮總兵二十一年英吉利兵船犯廣東海口博勒恭武帶兵協剿出力下部優敘二十七年署提督二十八年陞甘肅提督二十九年調湖北提督咸豐二年八月廣東會匪洪秀全等竄湖南撲長沙省城博勒恭武遵旨帶兵於岳州防堵十月奏疊次拏獲粵匪奸細並糾黨謀逆之土匪李際望徐先運等其夥匪在巴陵縣石步橋地方恃險拒捕添派官兵迎剿殲擒數十名奪獲旗械各件請將出力弁兵保奏允之十一月粵匪犯岳州府博勒恭武師潰城陷湖北巡撫常

大淳奏聞上命先禡博勒恭武職並敕查是否禦賊受傷嗣湖北漢陽武昌相繼失守復命查如何下落三年三月署湖北總督張亮基遵旨查明節次逃避各情據實奏聞諭曰已革提督博勒恭武自岳州潰逃後帶兵徑回武昌又棄軍私回漢川復藉養病輒回穀城提督本署今又欲前赴江南軍前報效種種荒謬實出情理之外該革員以湖北提督大員奉旨防守岳州乃始則見賊先遁繼則輾轉偷生若不明正典刑何以申嚴紀律博勒恭武俟提解到省著卽處斬毋庸再行請旨四月潛逃至京城外被獲詭稱湖北宜昌府同知陞任福建延平府知府衍秀上年武昌城陷後逃出與已革提督博勒恭武係屬姻親經順天府以形蹤詭秘奏聞命交刑部嚴訊尋鞫實諭曰博勒恭武係湖北提督大員前派防堵岳州不能防守郡城以致失守罪已難辭乃自岳州潰逃後由湖北穀城改裝易服逃至清江又潛至京城外黃村假名圖脫種種狡詐實出情理之外直至拏獲交部審訊始行具呈曉曉置辨無論一面之詞殊難憑信卽令當時遇賊接仗而於潰散後南北逃避輾轉偷生亦屬罪無可道博勒恭武著卽處斬遂棄市子貴山刑部員外郎同時下部審訊議上諭曰貴山於伊父輾轉逃避各情容隱不言原無

坐罪之律惟博勒恭武所犯情罪重大貴山著卽照部議革職以示炯戒次子貴德湖南興寧縣知縣

常祿

常祿富察氏滿洲鑲白旗人由藍翎長於道光十二年授護軍校十四年遷委護軍參領十五年陞副護軍參領十六年揀發雲南以參將用十九年補提標中軍參將二十三年擢楚雄協副將二十六年署臨元鎮總兵咸豐元年三月廣西會匪洪秀全等倡亂署雲貴總督張亮基檄常祿率師赴剿時賊屯踞桂平縣之金田村常祿隨總兵經文岱等疊次擊走之署廣西巡撫周天爵等奏聞賞戴花翎嗣賊由桂平竄踞象州中坪一帶經大兵環擊復乘間竄回桂平踞新墟及莫村六月常祿隨經文岱等由馬鞍嶺進攻與總兵李能臣等合直抵莫村殲賊無算新墟援賊亦敗遁七月賊踞紫荆山其地前控新墟後枕豬仔峽雙髻山大兵分隊環攻常祿等由馬鞍山攻其東面抵新墟轟擊四時之久敗之閏八月賊由紫荆山竄陷永安州常祿等赴援與各軍圍攻疊有斬獲十月都統烏蘭泰檄常祿攻城之南總兵秦定三等由銅盤村一帶接應烏蘭泰躬自督師攻城之北城中

及近村之賊繞鬪嶺由後來襲我兵合力擊走之殪賊五六百名二年三月陞河南河北鎮總兵時賊由永安州潰圍四竄犯桂林省城常祿偕提督向榮等赴援力戰卅月圍始解尋以守城功賞強謙巴圖魯名號五月賊竄湖南道州常祿偕總兵和春等追剿逼城圍攻疊有斬獲六月賊乘夜突常祿營由小路竄逸常祿坐防禦不嚴革職留任七月賊由嘉禾縣桂陽州陷郴州常祿偕和春等擊走之惟郴州未下八月以賊分股由醴陵犯長沙省城並偵知郴州踞賊亦將棄城與永興之賊合併力東下常祿令候補守備張國樑於安仁縣截擊躬自督隊克復永興縣城得旨開復原職嗣郴州之賊改道由茶陵州下竄常祿首先擊之於石家嶺又偕總兵李瑞等分道追剿累戰皆捷搜戮賊渠數名偵知賊由小路竄醴陵遂偕經文岱等渡河尾擊抵丹陵橋經經文岱等奮力接戰賊退踞譚家村將分股從山溝鈔襲適常祿等兵至分左右從高壓下並令張國樑燬村中民房烟燄蔽天賊大潰斬馘殆盡九月偕李瑞等進援長沙抵洞井鋪扼城之南賊疊次犯常祿營俱擊走之賊尋犯李瑞營槍礮如雨勢甚熾常祿等分投援應追殲無算遂密布連營遏賊竄平江瀏陽之路嗣大兵疊次合剿賊由河西翻山遁城圍

乃解常祿偵賊將遁豫繞西北兜擊以遏賊竄湘陰之路十一月賊由益陽縣竄陷岳州府遂犯湖北武昌省城常祿偕總兵王錦繡等赴援與巡撫常大淳等固守十二月賊於城西平湖文昌各門由江岸穴地道轟地雷而進東面向榮等援軍聲勢隔絕城遂陷常祿率兵勇巷戰力竭死之三年大兵克復武昌署湖廣總督張亮基署湖北巡撫駱秉章將常祿等殉難情形奏聞諭曰此次逆賊攻陷武昌闔城文武官員堅守二十餘日竟以力竭同時殉難朕每一念及悲憫淚零各該員嬰城固守臨難捐軀大節凜然允足垂型不朽著於該地方建立專祠以慰忠魂又諭曰該處文武力竭捐軀覽奏不勝憫惻前河南河北鎮總兵常祿著賞加提督銜卽照提督例議卹賜諡尋賜卹如例予諡剛節賞騎都尉兼一雲騎尉世職襲次完時以恩騎尉世襲罔替同治十年湖廣總督李瀚章奏准湖北殉難文武各員合建一祠常祿與焉無子以兄子內閣中書霍隆武爲嗣襲世職百日後引見賞員外郎

都隆阿

都隆阿舒穆祿氏滿洲正藍旗人由火器營藍翎長於道光六年隨參贊大臣武

隆阿出師喀什噶爾以功陞額外護軍校九年遷護軍校十五年充委參領十六年受副參領十七年正月陞參領五月遷掌關防營總十九年正月充委翼長十一月授正翼長二十年以在盧溝橋演放礮位礮炸傷官交部察議鐫級留任二十一年三月以副將揀發浙江補用時英人犯順竄擾浙江都隆阿以兩江總督裕謙檄赴鎮海防堵八月復帶兵駐守穿山一帶二十二年署太湖營遊擊二十三年署台州協副將二十九年補樂清協副將咸豐元年調平陽協副將二年署衢州鎮總兵三年粵匪洪秀全等竄陷江南省城並分踞揚州鎮江二府都隆阿帶浙江兵赴鎮江會剿尋擢雲南開化鎮總兵浙江巡撫黃宗漢奏仍留鎮江軍營四年鎮江踞匪由東南北三門分股竄出意圖圍撲營盤都隆阿偕總兵劉開泰等從南北兩面包鈔殲賊無算餘賊敗竄入城欽差大臣向榮奏聞五年復以高資黃池剿賊出力賞戴花翎七年正月因病陳請開缺回旗調理允之八年卒子文奎內閣學士兼禮部侍郎銜文瑞直隸候補副將

恆安

恆安薩克達氏滿洲正白旗人由黏竿處拜唐阿於嘉慶十一年陞補藍翎侍衛

十四年遷三等侍衛十七年陞副護軍參領十八年隨剿河南滑縣教匪接仗二十餘次殺賊多名生擒四名面受石傷經欽差大臣邢彥成以戰功保列超等二十一年五月發往江南以參將補用閏六月署鎮江營參將歷署督標左營並奇兵營遊擊淮安蘇州等營參將二十四年補蘇州城守營參將道光四年疊署撫標中軍參將五年擢廣東南雄協副將六年署三江口水師協副將七年調補兩廣督標中軍副將旋擢潮州鎮總兵九年八月兩廣總督李鴻賓以恆安與潮州鎮人地不宜奏請開缺酌量補用從之十一月補高州鎮總兵十二年搖匪由大古坳竄據陽公岐五月恆安以李鴻賓檄總理營務翼長八月偕副將張必祿會合黔楚廣西各軍進攻左山梁四面兜圍賊殊死戰我兵奮勇前進槍礮齊施賊大潰乞降隨將首匪房大第六等縛獻排搖平以功賞戴花翎十三年七月調補福建漳州鎮總兵十一月入覲旋調廣東南韶連鎮總兵十六年丁母憂十八年服闋補湖北鄖陽鎮總兵歷署提督三次二十三年因病乞休允之並賞食全俸咸豐三年卒子英滙四川敘州府知府英智候選鹽大使

文俊

文俊博爾濟吉特氏蒙古鑲黃旗人由護軍於道光三年陞藍翎長七年陞護軍校十年陞委護軍參領十六年兼御前烏槍差使十八年陞副護軍參領十九年七月棟發雲南以參將用十二月署臨元鎮標中軍遊擊二十年補武定營參將二十一年署楚雄協副將二十四年署龍陵協副將二十七年二月署曲尋協副將兼署中軍營都司十二月擢督標中軍副將旋以姚州回匪滋事雲貴總督林則徐飭文俊赴白鹽井駐紮防堵二十八年四月移駐大橋堵緝回匪十二月林則徐偕巡撫程矞采奏姚州回匪挾讎燒殺並欲蔓延白鹽井文俊帶兵馳往駐防晝夜彈壓半載有餘所獲皆斬梟斬決重犯井地得以安全實屬辛勞不著賞戴花翎咸豐元年五月總督吳文鎔遵保堪勝總兵人員以文俊疏薦送部引見得旨交軍機處記名十二年陞臨元鎮總兵四年二月命署福建陸路提督十月到任十一月卒子霍隆武三等侍衛

褚克昌

褚克昌雲南雲南縣人由武舉投標學習歷拔督標右營千總咸豐元年五月因會剿粵匪獲勝以守備儘先陞用賞戴花翎十二月補雲南臨元鎮標中營守備

五年粵匪竄擾雲南克昌防剿出力以都司儘先陞用先換頂帶六年七月貴州苗教各匪滋事隨總督恆春帶兵赴剿時苗匪負隅抗拒結寨於翁樹河又分屯米桶寨爲聲援克昌偵知之偕副將陳得功由常平山一路進兵直薄賊壘縱火焚燒數十寨擒斬數百人乘勝追捕生擒巨逆王澄沅等另股賊渠據老巢恃險固守克昌同遊擊巴揚阿密計設伏誘之自率輕騎由間道進攻擣其巢並敗賊於翁樹河捷聞以遊擊留於雲南補用八月補開化鎮標左營都司復以攻剿螺螄壳等處功賞勤勇巴圖魯名號七年回匪圍攻雲南省城克昌會合各路援兵攻破北門外賊壘疏通糧路經巡撫桑春榮奏入以參將陞用時省城外東西南三面均爲回匪占據日肆焚掠城內匪黨復布散謠言乘勢劫奪人心惶惑克昌督率親兵擒斬匪黨數十人城防始固經總督吳振械奏入以副將儘先卽補先換頂帶九年正月署普洱鎮標中營遊擊七月攻克南城外江右館據匪得旨交軍機處記名以雲南總兵簡用十年四月大理逆回杜文秀擾及迤西楚雄一帶總督張亮基以克昌久歷戎行稔知賊狀奏請署雲南提督檄令馳往督剿連戰皆捷賞提督銜五月授雲南騰越鎮總兵仍兼署提督七月克昌督軍至沙橋壘

清史列傳
次擊賊獲勝遂由雲南縣進兵規復大理府爲賊阻不得進遂營於賓川州屬之太和村賊大股麕至克昌與賊相持互有殺傷時回匪蔡七二等句結南路回匪攻陷楚雄鎮南廣通等府縣附省之祿豐安寧亦相繼失守克昌陷入賊境四面隔絕餉運不通回匪知援絕圍攻益力兵練潰散克昌獨率子姪十餘人直衝賊營日夜轉戰不息徧體受傷力竭死之子姪並殉焉十一年巡撫徐之銘以聞諭曰署雲南提督騰越鎮總兵褚克昌剿辦賊匪屢著戰功上年七月閒率子姪力戰陣亡深堪憫惻褚克昌著照提督例從優議卹尋賜卹如例贈太子少保銜予諡武烈賞給騎都尉兼一雲騎尉世職襲次完時以恩騎尉世襲罔替

鄧爾恆

鄧爾恆江蘇江寧人父廷楨官陝西巡撫自有傳爾恆道光十三年進士改翰林院庶吉士十五年散館授編修二十三年充廣東鄉試副考官二十四年授湖南長沙府遺缺知府二十五年補辰州府知府二十六年丁父憂二十八年服闋授雲南雲南府遺缺知府二十九年補曲靖府知府咸豐三年以捐備軍餉賞戴花翎是年回匪馬二花肆擾尋旬旋竄東川爾恆隨總督羅繞典巡撫吳振械帶兵

剿之首犯就擒四年賞加道銜六年護理鹽法道時彌勒縣賊匪劫獄戕官勢甚猖獗爾恆偕署副將陳得功會同迤東道潘楷赴剿殲殺甚衆生擒賊首吳美朱順等二十餘名餘匪紛竄爾恆等督兵乘霧登山進剿復斃三百餘生擒匪首李在等地方肅清雲貴總督恆春上其功命留於雲南遇有道員缺出請旨簡放旋補鹽法道時昆陽之海口回匪滋事巡撫舒興阿檄爾恆進剿七年回民就撫賞加按察使銜尋署按察使是年曲靖回匪糾衆竄擾省城爾恆例應議處上嘉其晝夜登陴巡防得力寬免處分十年二月授按察使七月陞布政使十月擢貴州巡撫十一年正月調陝西巡撫五月雲南巡撫徐之銘奏據署迤東道唐簡督辦迤東軍務副將何有保等稟報調任陝西巡撫鄧爾恆於三月十二日由馬龍行抵曲靖暫居府署偏隅至二十二日夜間突有賊匪擁入搜搶箱籠雜物爾恆驚起捕拏致被拒傷殞命當經兵役將賊匪李寶等戮斃並拏獲董有等六名正法梟示請將爾恆照歿於王事例飭部議卹諭曰鄧爾恆係巡撫大員被賊戕害首犯李寶等雖經官役戮斃並拏獲董有等正法惟曲靖文武各員所稟情節支離殊多疑竇著劉源灝迅卽查明具奏先是爾恆之在滇也何有保橫恣不法爾恆

深疾之比赴巡撫任何有保率人於中途盡劫其裝爾恆廉知之聲言欲據情參奏何有保聞之懼會爾恆行抵曲靖何有保陰令練勇戴玉堂等糾黨戕殺之脅官吏以盜聞尋何有保索分所劫贓不獲以火烙戴玉堂背戴玉堂憤甚伺隙復刺殺何有保同治元年雲貴總督潘鐸訪獲戴玉堂翰實奏明正法諭曰調任陝西巡撫鄧爾恆因何有保屢行不法爲害地方欲行參辦致被何有保聞知戕害殊堪憫惻著交部照例議卹尋部議照二品官陣亡例賜卹予諡文愨賞騎都尉世職襲次完時以恩騎尉世襲罔替